

賀前村先生編

泉善快覽

郭介梅署



眾善快覽序

今天下浩劫頻臨。幾無淨土。要皆廢棄道德。競爭勢利。塗炭生民。戾氣干霄之所由致也。茲欲糾正人心。挽回天意。非敦崇古道。剷除惡習。終不足以格天心。而順輿情。陝西商南賀君箭村。深悉興廢存亡之理。編輯各種善書。亟謀挽救。不遺餘力。不惜巨貲。豈尋常所能幾及哉。既編古今善書大辭典。似可無復他求矣。乃又編纂德藝叢刊。及明清善果大辭典。刊佈遐邇。近聞更編眾善快覽。其意志之堅。魄力之偉。真令人望塵莫及。追憶春秋戰國。世衰道微。非孔孟闡揚道德。安能潛移默化。以維繫至於今日。值斯民彘日墜。衣冠多淪於禽獸。甚恐長此以往。無人力謀匡救。則亂臣賊子。必更甚於春秋戰國矣。今賀君編印之書。層見疊出。是誠爲國家謀樂利。爲草野計安全。豈特救晚近之浩劫。追太古之遺風而已哉。其功德似可媲美孔孟。殆所謂天下之善士者歟。雖然。賀君之善行固屬可嘉。而海內之同志。諒亦不少。甚願巨室紳商。爲之匡助。則善書之流通。愈遠愈久。而人心之感格。益切益深。堯天舜日。於斯再覩。豈不幸歟。資不謬歟。

湖南湘鄉溫泉老人謹識

衆·善·快·覽·序

自序

昔者大舜聞一善言。見一善行。若決江河。沛然莫之能禦。且善與人同。樂取於人以爲善。此所能邈大同之治也。下此若禹聞善言則拜。孔子之擇善而從。顏子之得一善則拳拳服膺。東平王之爲善最樂。以及歷代賢儒仙佛。莫不視善如飴。而孳孳行之。是善也者。爲人生必由之明路矣。僕生長山中。瞬將而立。撫躬自問。殊無一善之可錄。居恆拜讀古今善士之言行。不禁起敬起嘉。而自汗愧。去歲春。不揣冒昧。發啓徵求善書。用編古今善書大辭典。不過聊矢所願也。乃蒙各地之。大善知識。贈書相助。絡繹至今。尙有來者。僕敬收之下。除錄其梗概於善書大辭典外。並選其闡倡道德之文藝。輯爲德藝叢刊。更採明清兩代先民行善而獲果者。輯爲明清善果大辭典。非敢有列於著作之林。實欲藉編纂善書。以警束身心。且以之而勸世也。茲復搜羅近代善士之論文。及古今善官之告令。與各慈善團體之宣言啓事章程。以及近出善書之序跋。疇昔中外善人之言行。並現代善苑之詩歌。與現代年邁花甲之善翁事略。以次編纂。一則爲表彰過去之善。二則爲整理現在之善。三則爲開導未

來之善。是此一舉也。可以概括眾善。於予心殊覺甚快。想覽之者。亦必同此快也。因名之曰眾善快覽。倘蒙各地賢明。賜予匡助。多爲印送。俾各界同仁。咸快覽之。咸仿行之。共止於至善之地。而實現大同。是則予之所深望也夫。

中華民國二十四年歲次乙亥小陽月朔陝西商南愛竹天民賀箭村謹識於古今
善製編述館

眾善快覽初編目錄

善士論文

籌辦各縣市鄉宣講蜀議
改過學正可以光耀宗祖
論今後祀孔不宜用牲牢

善官告令

清浙江程大中丞嚴禁溺女並酌定嫁資示
清江陰縣恤孤義塾示
清江蘇按察使嚴禁淫書淫畫示
清上海道通飭示禁淫戲頒發永禁碑式
清上海縣示
清蘇撫部院嚴禁捕魚示
鹽城縣政府佈告

南京慈幼院義務教員 郭介梅
楊鍾鈺

姜涵塵

交通部郵政總局通令

廣東民政廳長林翼中通令

善界宣言

上海護生報出版宣言

上海慈善彙報發刊宣言

福寧惜字會宣言

中國儒佛合一救劫會宣言

善團啓事

甘肅岷縣郵局圖書館徵求書報啓事

中國保護動物會徵求會員啓事

慈善彙報徵稿啓事

杭州國學善書館徵求啓事

擬編中國先賢家訓叢書徵稿啓事

善體章程

寒世子

猛省生

復初居士

潘對彪

張旺

財政部長孔庸之等

主編者

籌備同仁等

賀箭村

佛慈放生會章程

中國放生基金會章程摘要

任印善書文誼會徵求會員簡章

慈善彙報投稿簡例

湖南邵西救生會簡章

善書序跋

重訂得一錄序

精神錄序

溫光熹先生嘉言錄序

鴻嗷輯振災篇序

養生鏡序

救世實言序

省餘存稿序

青年修養箴言序

無錫國學專修學校校長唐文治

江蘇災防會委員長王震

吳步鑾

國賑專員成靜生

楊瑞葆

王昌杰

陸軍新編第二師師長盧興邦

陳慧昶

鴻傲輯跋

中國良心崇善會會長丁健康

陸放翁家訓跋

中國保護動物會理事聶其杰

善事廣徵 共二十七則

善言博採 共三十二則

善苑詩歌

節欲口占

中國賑災會閩皖勘災委員郭介梅

鴻傲輯題詞

中國賑災會委員長許世英

杯渡齋文集題詞

陝西賑災會主任王典章

題觀音法要醒言

崇信觀音同志會會員姚鑑清

偶過刑場痛言

任印善書文誼會撰述員曾漱瓊

省餘存稿題詞

上海世界佛教居士林編輯部主任程翼雲

慈善彙報兩週紀念題詞

陳錦文

讀慈善報有作

李志標

慈善彙報出世

姜履

三達德吟

贈朱子橋將軍

放生救物得智四章

奉題增福橋徵信錄

和嚴筠清女士原韻

崇信觀音同志會醒言

贈黃涵之道尹

勸戒烟五言百字歌

戒殺放生歌

勸孝親歌

慨言

善翁事略

溫泉老人

常寶子

蔡振紳

中國放生會水災查放局長 郭介梅

曾漱瓊

任印善書文誼會臨時會長 樂秀生

崇信觀音同志會會員 冉寬洪

姚清陽

中國保護動物會調查委員 郭介梅

陳錦文

崇信觀音同志會會員 劉咸榮

楊覺儒

中國放生會一等顧問 郭介梅


編者徵輯

以上各類。悉卽所知所見者錄之。其有未盡者。容續編再行補鈔。並望各方善團。按類投稿。以充篇幅。無任拜禱榮幸之至。如蒙惠賜。請由陝西商南富水關信櫃轉交。或河南荆紫關轉商南富水關亦可。

古今善製編述館主人賀箭村附識

衆善快覽

華陝商南愛竹天民賀信筠箭村編輯



善士論文

籌辦各縣市鄉宣講芻議

江蘇無錫楊鍾鈺字章甫

謹案周禮州縣各官以歲時帥民讀法。孟子云。壯者以暇日。修其孝弟忠信。楚莊日討國人而訓之。晉文教民以禮義信。此皆市鄉宣講之權輿也。後世循良之吏。如卓茂。魯恭。程明道。張橫渠等。皆以敦本善俗爲先。教民以孝悌忠信。使有勸有恥。德化大行。而范忠宣。陸清獻。勸化獄中之盜竊屠販。能使感悔遷善。皆宣講之效也。至士大夫德化鄉里者。如陳仲弓。王彥方。管幼安。邵康節等。與子言孝。與弟言悌。與朋輩言忠信。循循善誘。鄉無鬪訟。道不拾遺。甚至盜賊聞風革面。亦宣講之效也。歐美各國。教養詳備。每逢星期日。老幼羣集聽講。關於個人道德。與公眾道德。娓娓不倦。敬天愛羣。言行要對良心而無愧。而美國又有勸世會。化罪會。防惡會。勸和會等。以勸善遏惡。排難解紛。亦成周歲時讀法之遺風也。今中國四百兆人。愛教育者不及什

一二。此外皆不教之民。不知五倫八德爲何事。西人譏爲半開化之國。邪說乘機而入。匪惟可恥。亦大可憂也。竊謂各省各縣。宜就城鄉市鎮往來通衢。多設宣講所。每縣至少二三十處。內排長檯。或備茶水。附近公正之士紳。明白之耆老。及師範生教員。宗旨純正者。均準報名爲講員。每所以六七員。至十數員爲度。每日輪講六小時。至宣講書籍。請用孝經、小學、人譜、各種德育書。各種因果報應書。以孝友、仁慈、信義、禮讓、勤儉爲標準。旁及禁烟、酒賭、禁溺女、禁淫戲、攤簧、禁非時宰殺、漁獵。以至改良農林、水利、工藝、衛生等書。次第宣講。以正風俗。而開民智。多人輪講。則不廢本業。願盡梓桑義務。正經紳士主講。則鄉人愛敬。感化者眾。每日講至六小時。則鄉民可隨時赴聽。仍請官紳籌款。爲宣講所津貼雜支之用。由地方官、市鄉政府、稽其勤惰。講員熱心化導。成績卓著者。由地方官獎以匾額。其尤者轉呈省政府、教育部。分別給獎。至監獄及看守所。亦定期宣講。以動其悔過遷善之心。各工廠則分途宣講。勸以勤儉治生。勞資合作。以拒煽惑。維實業而計久長。此推廣宣講之大概辦法也。竊望吾邑官長紳耆。賢豪志士。鼎力提倡。推廣各市鄉宣講。使闔邑無不教之民。羣趨於孝悌睦嫻。愛國愛鄉之一途。以爲各省模範。尤望政府及各省官紳。內外協力。普設

宣講所。達於山陬海澨。人人知改過遷善。尊尊親親長長。以復唐虞三代邅治之隆。顧不懿歟。見重訂得一錄

改過學正可以光耀宗祖

江蘇鹽城郭介梅字靖林

格物致知。乃聖人傳經之要法。改過遷善。爲孝子榮親之良方。人欲之物。由外境而生。思顯吾心固有之良知。必將外境格除淨盡。卽所謂明其明德也。明德既明。則意誠心正而身修矣。匹夫匹婦。皆所應行焉。若以推極吾之知識。窮盡天下事物之理。爲格物致知。雖聖人亦有所不能焉。苟能明其明德。窮則獨善其身。達則兼善天下矣。然思人欲淨盡。必期日寡其過。以爲進德之導師。孔子以德不修。學不講。聞義不能徙。不善不能改爲憂。行年七十。尙欲天假數年。以期學易而免大過。况吾人日在過中。而不知慚知改乎。凡日間所作之事。夜間所起之念。有一不能筆於書而告於人者。均惡業也。父母遺我身體。保守應如執玉。修德如玉上發光。父母亦得榮耀之名。作惡如以玉投石。身爲齏粉矣。大孝終身慕父母。自有爲善不息之心。遇事若對父母。何敢造過傷德乎。人非聖賢。孰能無過。過而能改。善無復加。改過如昨日失足墮於糞坑。今日再三洗淨。以後嚴防失足。恐其再墮糞坑。造過如在糞坑。正人惡其

臭穢。改過如盟白水。取供諸佛神明。皇天無親。惟德是輔。若不廣行好事。成就自己之人格。將何以對天地聖賢之生成。與祖宗父母之恩養。不過名之爲人。實則與禽獸同性。甚至無禮無恥。不義不仁。卽禽獸亦不如矣。見杯渡齋文集

論今後祀孔不宜用牲牢

山東膠縣姜涵塵

孔子之道。仁道也。仁者無不愛也。故曰。親親而仁民。仁民而愛物。記曰。天子無故不殺牛。大夫無故不殺羊。士無故不殺犬豕。庶人無故不食珍。孟子曰。君子之於禽獸也。見其生。不忍見其死。聞其聲。不忍食其肉。是以君子遠庖廚也。論語。記子釣而不綱。弋不射宿。則仁人君子之用心。其不爲口腹之欲可知矣。况以民胞物與之義推之。則萬物皆吾一體。若殺彼生命。以養吾生命。微特於禮不合。卽問之良心。亦覺太忍。且孔子蔬水曲枕。樂亦在中。顏子簞食瓢飲。不改其樂。此卽周子所謂孔顏樂處也。孟子謂養其大體爲大人。養其小體爲小人。又曰。勿以小害大。勿以賤害貴。然則諸大聖賢。在生時已自不爲養口體之小人。而爲養心性之大人矣。豈其死後反徇口體之欲。而爲小人乎。且吾人之所以尊孔者。乃尊其道與德耳。旣尊其道與德。則祀之之禮。卽當本仁術以敬孔子。不當多殺以爲事矣。或曰。太牢之制。原爲周公所

定。祀天之大典也。今以之祀孔者。正欲以祀天之禮祀孔子。其尊之也。不綦重乎。曰。太牢之制。雖爲周公所定。然揆之以義。實非盡善。蓋必爲畜牧時代之制度。而相沿以至於今也。何也。古代初民。農業未興。火化未有。食草木之食。鳥獸之肉。飲其血。茹其毛。故死後祭祀用牲。所謂血食也。三代之時。去古未遠。所以周公制禮。猶遵此制。然以仁道言之。實有違於愛物之說。亦顯背上帝好生之德也。故曰。非盡美盡善之禮典也。猶如古之葬者。用人爲殉。至列國時。此風猶存。以秦繆之賢。而猶不能脫此習俗。至以子車氏之三子爲殉。詩人譏之。宜也。自孔子作俑。無後之說出。而後此風遂漸泯矣。甚矣陋風惡俗之難挽也。且吾聞鬼神有氣無質。其享祀也。全憑生人一念誠心之所感召而來。享不在物之輕重也。故易曰。東鄰殺牛。不如西鄰之禴祭。實受其福。詩曰。黍稷非馨。明德惟馨。夫然。則真正尊孔者。富在德而不在物矣。夫畜牲之類。形體雖與人殊。而其貪生畏死之心。與人無異也。不過以智不及人。力不及人。遂爲人所宰割耳。且天地之大德曰生。故舜則鳥獸咸若。湯則恩及禽獸。文王澤及枯骨。孔子參天地。贊化育。濟人利物。凡有血氣。莫不尊親。此皆本仁心。行仁政。故萬物莫不被其德也。豈欲人之殺無數生命。以奉己乎。孔子有知。必不歆其祀矣。何以

言之。夫以中國幅員之廣。省州府縣之多。無一不有孔廟。而二八大祭。每年二次。所殺之牲。不知幾千萬億。流血成河。積骨如山。其輾轉叫號於刀俎之下。烹炙於鼎鑊之中者。幾令人慘不忍聞。目不忍覩。豈以參贊之聖。而反不仁如是乎。故殺生祀孔者。非微不能尊孔。直是爲孔子而造無窮之孽矣。吾故曰。孔子有知。必不歆其祀矣。或曰。然則祀孔之禮可廢乎。曰。何可廢也。傳曰。潤溪沼沚之毛。潢汚行潦之水。可薦於鬼神。可饒於王公。苟有誠心。雖蔬食菜羹可也。苟無誠心。雖日用三牲無益也。昔梁武帝祀天用麴牲。意至善也。而後世非之。謂其爲不血食之兆。南北朝之際。唯梁武享年最永。其祀幾致小康。其餘若宋。若齊。若陳。若隋。若北齊。北周。大抵皆享年未久。卽國亡族滅。豈得以此獨罪梁武。俗儒無識。小智自矜。抑何可哂。故祀典雖不可廢。然必謂多殺物命。始爲祭禮之重。則不如以此殺牲之錢財。多行慈善之事業。尤能慰我先聖之靈也。何也。聖人之心。與天地合德。日月合明。仁慈滿腔。利濟爲懷。非徒嗜口腹之欲者也。自歐風東漸。人心陷溺。吃精穿絕。暴殄天物。以殺牛爲正當職業。以牛肉爲家常便飯。自古殺業之重。未有甚於今日者也。古德云。欲知世上刀兵劫。試聽屠門夜半聲。今人率皆沈溺於嗜欲。無復惻隱慈悲之心。則浩劫之來。何堪

設想。願當道諸公。與仁人善士。或爲提倡。或爲化導。革除積習。改易惡俗。於一切喪祭之禮。勿多殺生命。以傷天和。不爲死者造孽。且爲生者惜福。吾知慈祥之氣。蔚爲休徵。太和之風。演爲時尚。化殘暴好殺之心。變而爲仁民愛物之念。安見大同之治。不於此而立其基哉。

善官告令

清浙江程大中丞嚴禁溺女並酌定嫁資示

浙江巡撫部院程。爲嚴禁溺女以全性命事。照得父子之恩。本於天性。試問身從何來。母生之也。子從何來。妻生之也。身與子皆女人所生。而乃溺殺所生之女。不孝不慈。孰大於是。如謂難以撫養。殊不知天不生無祿之人。如謂生女不生男。殊不知天下儘有生男敗類。而生女賢孝者。如謂溺女以求男。殊不知忍心害理。天必不錫以佳兒。且殺機所感。禍卽隨之。歷觀古來溺女之家。惡報不爽。浙江溺女之弊。最爲錮習。大抵因出嫁費繁之故。聞民間嫁女。有用銀數百兩。數千兩者。旣嫁以後。則有三朝。滿月名色。逢年逢節。亦復如是。女若生子。卽送衣襪食物。自洗浴剃頭。週歲。用錢不可勝計。不知婚姻論財。古人所戒。嫁娶稱家之有無。苟無矣。則一衣一被。儘足成

禮。諺云。好女不穿嫁來衣。古有公主下嫁。而荆釵裙布。敦行婦道者。石碣有曰。愛子者。教之以義方。弗納於邪。驕奢淫佚。所自邪也。婚嫁爲人道之始。奈何不教之。以儉而反。教之以奢乎。卽富家莊田有餘。儘可分給女兒。何以華靡之物。作嫁資。以相誇耀乎。至節次送禮。不特費錢。亦且折福。嗣後民間嫁女。總以銀器數事。布帛數件爲度。卽富家不得過銀百兩。中戶不得過四五十兩。下戶不得過二三十兩。卽三兩五兩。亦可嫁女。其男家財禮多寡。聽其自便。彼此不得爭競。嫁女以後。止許以一二樣食物。偶爾探望。一切三朝滿月。至爲外甥洗浴。作週歲等事。概行禁止。民間嫁女。不難。庶養女者多。不致溺斃。如貧家不能乳女者。卽送入育嬰堂。或與人作童養兒媳。本部院現在通行各府州縣。勸諭紳士商民。各於本鄉本俗。捐貲積穀。育嬰養老。該紳耆務須共相化導。毋再溺女。倘再有犯。一經察出。定行照例治罪。特示。道光五年七月初一日示。見得一錄。

清江陰縣恤孤義塾示

江陰縣正堂金。爲勸建恤孤義塾。以維風化。而儲賢才事。據紳士鄭經等稟稱。地方義學之設。所以培養寒微。玉成善類。經前憲陳出示勸建。纂入縣志。嗣以移署淮南

監掣輟而未作。現經他邑風行。著有成效。急宜籌勸。創建義塾。竊念寒微之苦。莫甚於孤兒。成立之望。莫切於節母。苦節望其子讀書顯揚。次之謀生爲急。但其指頭所入。度日已艱。脩脯待謀。攻書不易。聽鄰童誦讀。似箭攢心。任孤露嬉游。如針刺背。卽或吞饑忍凍。累寸積銖。幸有脩脯可供。傳說稍遲。門徒已滿。屢年癡想。終至蹉跎。薄命孤兒。真堪痛哭。此節婦望其子讀書之切。而其子不獲讀書之苦。誠有目不忍觀。口不忍言者。且敬節恤孤。周其衣食。固在所當先。而惟特設義塾。則不獨恤其身。并恤其心。不獨恤其一生。并恤其先世後世。誠使延師善教之時。卽在周恤饑寒之後。俾孤與孤處。類相憐。憐相識。識相奮。則賢達出其中。科名出其中。卽不然。苟得一技謀生。熟知禮義。激發天良。節母賴以終身。孤子不入非僻。則興舉豈迂緩之圖。籲懇諭董。妥議章程。一面出示勸捐。興辦等情。到案。據此。查義學本屬善舉。而於窮嫠苦節之子。尤當憫恤。該紳等實心求善。深堪嘉尙。爲此示仰閭邑紳富士民人等。知悉。務宜踴躍輸捐。共勸善舉。俾窮兒孤子。不致失學。是則造福無量矣。本縣實深厚望焉。切特示。道光二年。見全上下四則同。

清江蘇按察使嚴禁淫書淫畫示

江蘇按察使司按察使裕。爲嚴禁淫書淫畫。以正風俗事。照得淫詞小說。壞人心術。是以例載造作刻印者。杖一百。流三千里。市賣租賃者。杖一百。徒三年。買看者。杖一百。仍不准借端出首訛詐各等語。淫畫亦應比照問擬。定例何等森嚴。本署司到任以來。訪聞蘇城坊肆。每將各種淫書。翻刻市賣。並與外來書賈。私行兌換銷售。及鈔傳出賃。長惡導淫。莫此爲甚。至淫畫顯導邪淫。較淫書爲尤甚。乃蘇郡如閶門、桃花塢、及虎邱、山門內等處。公然懸掛售賣。合亟出示嚴禁。爲此示仰各書鋪書賈。及刻字鋪、畫鋪、古董鋪人等知悉。凡一應淫詞小說。永遠不許刊刻、販賣、出賃。及與外來書賈私商。兌換銷售。淫畫亦不准繪畫作賣。現在吳縣學官。設有公局收買。爾等舊存淫書板本。及淫畫冊卷。概行送局銷燬。仍給價值。并免究問。如敢不遵。及外來書賈。攜帶淫書。在蘇逗遛。一經訪聞。或被告發。定卽委員嚴拏。照例治罪。後悔無及也。其各凜遵毋違。特示道光十八年五月。

清上海道通飭示禁淫戲頒發永禁碑式

蘇松太兵備道應。爲通飭示禁事。照得搬演雜劇。律內只許粧扮孝子順孫。義夫節婦。勸人爲善之事。近來戲班多演唱各種淫戲。導人爲惡。最堪痛恨。又有一種浮蕩

之徒。往往喜點淫戲。觀者目炫心迷。害及閨閣子弟。且鄉間演戲。皆爲酬神邀福起見。試思聰明正直之爲神。顧可演淫戲以褻瀆之也。至花鼓淫戲。本干例禁。演之者皆圖誘人取賭。尤爲風俗人心之害。去年業經通飭嚴禁。茲本道訪聞此風仍未盡絕。自應一體嚴加示禁。以正人心而端風俗。除刊刻告示外。合行札發通飭。札到該某卽便遵照。轉發各屬。遍貼曉諭。并於常年淫戲最多之處。豎立禁碑。俾眾觸目驚心。其鄉間演唱花鼓淫戲。開設賭場之人。應如何拏辦。以靖地方。其尋常戲班演唱淫戲。紳士隨時隨地。開導禁止。以挽頹風。均卽由府州廳縣各就地方情形。酌議具覆。切切特札。同治六年十一月。

清上海縣示

松江府上海縣正堂葉。爲曉諭事。照得去冬風雪較多。今歲春寒尤甚。又兼米價騰貴。外來無業流民。饑寒交迫。凍臥道傍。不一而足。本縣目擊情形。殊堪憫惻。除已札知同仁堂董事。設法辦理外。合行示諭。爲此示仰各鋪小甲知悉。凡城廂內外。有貧病流民。凍臥道傍。將斃未斃。不能行走者。該地保甲問明原籍。並姓名年歲。先行報堂。俟該董事查明確實。然後擡至棲流公局。日給稀粥調養。如春和病愈。聽堂酌給

盤費。卽令他往。如有病故。仍填明聯單。照章備棺殮埋。若係本邑近方人民。自有親屬。至江湖乞丐。則有該管丐頭收管。不得混報。倘有刁詐棍徒。藉圖充入。乘端滋擾。有妨善舉者。該保甲卽行扭稟。以憑盡法懲治。爾等亦須奉公佐善。不得徇情。致干提處。毋違。特示。道光二十年。

清蘇撫部院嚴禁捕魚示

蘇撫部院張。爲申明舊禁。剴切曉諭事。照得蘇城虎邱前一帶堤河。及相近東西各港。原係放生官河。永禁採捕。本部院前於藩司任內。歷經出示嚴禁。在案。茲聞日久廢弛。該處仍有不肖居民。及漁戶人等。罔顧生靈。公然違禁。或操鷹舟。或張巨網。肆行捕捉。致潛鱗無一綫之生機。地保人等。得規包庇。殊堪痛恨。除訪拏懲辦外。合行剴切曉諭。爲此示仰該處居民。及漁戶地保人等。知悉。自示之後。爾等如敢在放生河內。肆行採捕。戕害生靈。一經本部院查出。或委員稟報。立卽嚴提懲處。如該處地保。受賄縱容。一併究懲不貸。各宜凜遵。毋違。特示。嘉慶十九年。

鹽城縣政府佈告

案准義紳郭介梅呈稱。竊本鄉增福橋。向爲一四兩區人牛往來之要道。該橋旣無

基金。專賴募緣修葺。前此以迭遭匪毀。水漂損壞。不堪言狀。介梅爲在江浙奔走義賑事宜。近時回里。睹狀興悲。爰是不憚呼號。向各方勸募。復度材鳩工。已於本年三月九日修理完竣。惟恐有過往愚民。浮泛漁艇。仍蹈竊取橋料。損壞欄杆碼頭等等舊轍。則防害路政匪淺。蓋以曾奉錢王各前縣長出示嚴禁在案。嗣因時遠政弛。今既修復。若不請求嚴申禁令。必將仍有玩忽之虞。除抄帳公佈通衢外。故特呈請鈞長電賞授案佈告嚴禁。以杜竊毀。而重公益等情。并奉江蘇省鹽城區行政督察專員公署秘甲字第一六號令據前情。飭卽佈告保護等因。奉此。合行佈告。仰閭邑民眾一體知悉。修建橋梁。係爲便利交通起見。爾等務各遵照保護。自示之後。倘有不肖之徒。藉端破壞。一經察覺。或被告發。定卽提案從嚴懲辦。決不姑寬。中華民國二十四年四月五日。見增福橋徵信錄

交通部郵政總局通令第一六五八號

案奉交通部二十四年九月十九日第四五九零號訓令內開。查新生活運動。自蔣委員長于上年二月在南昌倡導後。早經各地組織新運會。積極進行。惟交通事業。具有特殊性質。其對新運之目標。當亦與他種事業有不同之處。茲除一般事

項仍仰與其他地方機關採取同一步驟外。復訂定本部所屬機關員工推行新生活運動綱要一種。就郵電航等事項。分別規定。除分令外。合行檢發綱要一份。仰即轉飭一體遵照等因。奉此。合行抄發綱要一份。令仰遵照。並轉飭所屬一體遵照。此令。

附發推行新生活運動綱要一份

甲 持躬

一、律已要時時謹嚴。二、時常檢點過去工作。反省過去行爲。三、言語須戒粗鄙。並應簡單扼要。誠實無欺。四、服裝要整齊清潔。五、對事應常抱樂觀。養成有征服環境之力量。六、自強不息。時時不忘鍛鍊身心。七、知過必改。從善如流。八、每日利用時間。選讀書報。九、不吸烟。不賭錢。不冶遊。十、愛惜時間。並養成守時習慣。十一、恥取非分財物。非自己勞力得到之報酬。絕對不受。十二、處理公務。不徇私情。十三、不以公物作人情。十四、選擇歷史上或當代偉人作自己楷模。十五、勿規避自己應盡之義務。十六、勿輕視自己職務對於國家之貢獻。十七、奉行三民主義。平時多閱黨義書籍。十八、參加國恥紀念。永遠不忘國恥。十九、

九、新生活運動要推己及人。

乙 處事

二十、爲公服務。不計報酬。二十一、做事要負責。不推諉。二十二、做事要迅速確實而有條理。二十三、做事不要草率。不避難就易。二十四、做事要有計畫。不妄動。不盲從。二十五、做事時應專心無外務。二十六、辦公時間勿做私事。二十七、按時作息。絕不怠惰。二十八、今日事。明日畢。二十九、保持公務之秘密。三十、成績報告要正確。處理要公允。三十一、前後任辦理移交手續。應絕對清楚。三十二、奉行命令。應切實不欺。三十三、有見到處。應貢獻意見。三十四、團體委辦事務。要熱心去做。三十五、遵守團體規約。服從團體紀律。三十六、辦理公務。應有合作互助的精神。三十七、爲公服務。應公而忘私。不得已時。應先公後私。三十八、認真辦理職工補習教育。

丙 待人

三十九、同事間不互相歧視。或存門戶觀念。四十、答人詢問。應態度誠懇。並應就所知詳細說明。四十一、服從指揮。接受忠告。四十二、長官對於所屬。應一視同

仁、公正無私。四十三、長官指導屬員。應循循善誘。四十四、資深人員。應負指導資淺人員之責。四十五、長官對於所屬。應嚴於考勤。絕不姑息。四十六、長官對於所屬。應充分使其發展優長。

丁 其他

四十七、絕對避免官僚壞習氣。四十八、嚴格遵守國家法令。四十九、專心本職。不兼外業。五十、辦公集會。必須絕對遵守時間。五十一、提倡公餘運動。及正當娛樂。五十二、婚喪壽宴。應恪遵國民政府所規定之公務人員革除婚喪壽宴浪費規律。有饋贈時。並應利用各種儲金禮券。五十三、婚喪壽宴等事。除親族或確有戚誼者。不濫發通知或請柬。接受禮物。不備具回儀。五十四、同事間絕對避免無謂的酬酢。五十五、同事有違法失職情事。應負責據實檢舉。但不得挾嫌攻訐或匿名誣告。五十六、各機關因公務招待或敍會。非必要時勿用筵席。並禁止供給捲烟。用筵席時。每席所費。以不逾十二元爲限。五十七、各機關用品。應盡量採用國貨。主管長官。並應督促員工服用國貨。五十八、庶務管理。力求合理化。禁止非公務使用公物。五十九、會計出納。力求明確撙節。六十、整理並利用廢物。

非必要時勿添置新物。六十一、愛護公物。六十二、辦公室及案頭。應佈置整潔。六十三、呈報因公受損請求慰卹時。絕不虛浮。六十四、交通員工應作到忠勤、謙、廉、敏、確、整、潔、八事。

戊 關於郵務員工者

六十五、遵守郵政綱紀。六十六、郵務員工。應諳習有關本職之郵政法規。六十七、郵電員工。應切實合作。鎔成郵電一體。六十八、絕對奉法尊重人民秘密通信自由。六十九、非依法律絕不開拆或隱匿郵件。七十、清理郵件。應迅速確實而有條理。七十一、郵件封皮。應妥爲保護。勿使污損。七十二、絕不遺失或誤投郵件。七十三、以迅速、確實、便利、表現郵政之精神。七十四、以穩固、便利、收益、引致人民養成儲金之習慣。七十五、儘量設法減少無法投遞之郵件。七十六、存局候領郵件。應妥爲保存。七十七、存局候領郵件。應注意存留期日。七十八、搬運郵件。上下車船時。應妥速。並須對人謙和。七十九、隨時隨地注意郵件之安全。八十、隨時隨地注意信筒之安全。八十一、郵件有遺失或誤投情事。應儘力追查。八十二、推行郵政儲金。八十三、退休後仍以在職精神關懷郵務。

廣東民政廳長林翼中通令民國二十三年

尙賢崇德。民志以端。養老賑窮。仁政之本。先總理對於保存固有道德。言之至詳。所見至大。慨莠言放肆。風習日乖。識見未定之徒。往往敢於爲非。無所忌憚。禮教未墜。閑檢自踰。幾至父兄之教。不行於子弟。此亦親民之吏。所急宜修省。而知所先務者也。本廳長前此出巡各屬。周歷民間。凡風俗之厚薄。習尙之淳澆。與夫政教之得失。皆詳爲審察。遇有性行淑良之人。以其爲鄉里所稱。必可爲人民矜式。無不優禮而嘉許之。區區之心。固自有在。茲就人民行誼。在今日尤當注重。宜受褒獎者。分舉於下。俾知所從。君子務本。本在孝弟。入孝出弟。古訓昭昭。昔鄭袤守濟陰。下車旌表孝弟。古今美之。蓋孝弟之人。最足正人心。而厚風俗。鄉閭之間。有克盡孝弟之道者。首宜注意。好善之士。俾益地方。隱德潛善。並宜旌錄。善人爲不善人之師。感化之力。甚大。其有嘉言懿行。尤當表而出之。孤嫠苦節。出於本心。原非責人必由之路。然易著婦人從一之義。詩存柏舟自誓之篇。婦德攸關。先儒所重。况有窮居孝養。忍死撫孤。事本難能。情殊可憫。其有孀婦守節逾二十年者。宜加採錄。勿任淹沒無彰。昔虞夏商周。皆稱尙齒。其在鄉黨。斯禮尤重。敬老所以使民興存。親親長長。其極效可致。

天下之平。且大德必壽。美意延年。能享長齡。皆由修養。凡有年八十以上之壽民。平時係安分守禮者。悉在褒獎之列。以上所舉。或有政府褒揚之例。或爲維持風化而言。其合於褒揚條例者。悉依條例及施行細則辦理。其爲條例所未載者。並宜留心採訪。酌照條例所定辦法。取其鄉鄰保證。開列事實清冊。呈候核明褒獎。尊賢貴老。實政教所宜先。禮士勸民。亦有司之本職。此事關係甚大。毋得視爲等閒。至鰥寡孤獨。皆無告之窮民。何恃爲生。深虞失所。有地方之責者。若一念其顛連之狀。能不惻怛於懷。查本年三年施政計劃。關於救濟事業。規定有貧民教養院。鄉村養老院之設。究竟曾否依期舉辦。能否酌量推廣。兼事收容。急宜悉心籌劃。未辦者尅期立成。已辦者力謀擴充。以免老弱無依。待填溝壑。當此庶政繁興之日。豈能無一夫不獲之虞。惟地方長官能多盡一分之仁心。卽人民減少一分之痛苦。民瘼所關。毋稍玩忽。自此次通令之後。各該縣市局長。務須遵令實心訪查。實力辦理。總期有裨風教。有補民艱。除分令外。合行令仰該縣長。即便遵照。並將遵辦情形。隨時詳細具報。以憑考核。切切此令。

善界宣言

上海護生報出版宣言 民國二十一年六月十八日

寒世子

嗚呼。天下之大。事孰有甚於迷信哉。而迷信之甚。尤孰有過於宰殺物命哉。此所以令仁慈之輩。爲之痛哭流涕者也。夫吾人與物類。同稟天地之氣。同具氣血之情。同知生之可樂。而死之可悲。奈執迷之流。重迷犧牲之虛文。鄙陋之輩。資爲饕餮之常需。而刀斧鼎鑊之慘毒。絕不稍念物類之痛苦。迷見若錮。殺氣彌天。忍心殺戮。哀聲動地。積習相沿。愈趨愈甚。可不哀哉。可不痛哉。夫人列三才之位。既未有補於世。已屬虛生。豈復昧理縱欲。直等狼虎。孟子曰。人皆有不忍人之心。又曰。無惻隱之心者。非人也。豈戒殺乃釋氏之專家。而獨非吾人所應行者歟。且如湯王之網開三面。子產之畜魚於池。孔子之釣而不綱。弋不射宿。孟子謂數罟不入於池。又謂見其生不忍見其死。聞其聲不忍食其肉。月令謂草木零落。然後入山林。昆蟲未蟄。不可以火田。西銘云。民吾同胞。物吾與也。尙書云。黍稷非馨。明德惟馨。易經云。東鄰殺牛。不如西鄰之禴祭。他如顏魯公蘇東坡之設立放生池。白香山黃魯直之不殺戒。煌煌紀載。昭同白日。管窺所及。已如上述。降及海禁既開。牛禁廢弛。而歷代特重之禁令。一變而爲風行之食品。乃陋者尤爲拾西人之餘唾。迷物質之新毒效。尤猖狂。不可一

世殊不慮及天府農國。荒蕪之地。計占全國面積之大半。其影響於農事。關係於民食爲何如耶。嘗聞歐美各國。有保護動物之定律。及提倡素食。以爲肉食含有好鬪之惡性。爲消弭殺機之根本辦法。抑物極返本。亂極思治者歟。吾中國開化之早。遠勝他邦。而一鞭之前。反讓歐美。清夜長思。於心何安。豈可任口腹之貪欲。恃智力之勝彼。而烹宰無已時。殊不察狼虎食人。亦不過恃暴力勝人而相侵。豈人亦以暴力之不敵。而甘心任彼食乎。因憶曩年報載非洲人肉市之駭事。驟聞之莫不令人咋舌。若習以爲常。亦必恬然無怪。一如吾人之宰禽畜。特以執迷之故。而流弊一至此極。且物類知感。何異於人。報應昭昭。書不勝載。豈曰非吾手殺。就可謂不吾罪耶。曷思常作操刀自割之想。其仍有不動於中者乎。亦可悟惻隱之心。爲吾人所固有。而日事割烹之惡習。極宜痛切鏟除之也。乃者天災人禍。遍地疊降。二十年來。死亡之眾。何啻百千萬人。生民之苦。未有甚於今時者也。雖戾氣感召。固非一端。然察其情形。殺業尤甚。嗟乎。口腹之味。刹那間耳。生死大事。物我一理。用是不揣鄙陋。發我愚忱。創刊斯報。乘機勸化。雖不能挽回災劫於一時。或亦得潛消諸禍於無形。願吾同志共鑒之。

上海慈善彙報發刊宣言 民國癸酉年季夏月朔 猛省生

嗚呼。天災人禍。未有甚於此時者也。水滂災。旱魃災。風雹災。紅雨災。黑霜災。螟蝗災。瘟疫災。山崩地裂災。種種災變。報不勝紀。軍閥禍。赤化禍。強鄰禍。漢奸禍。會匪禍。變兵禍。游勇禍。盜賊綁匪禍。種種禍亂。報不勝登。噫。此災也。此禍也。胡爲乎來哉。曰。人心造之也。人心如何造之。太上云。禍福無門。惟人自召。釋家云。造業受報。善升惡沉。孟子云。禍福無不自己求之者。詩經云。永言配命。自求多福。尙書云。作善降之百祥。作不善降之百殃。周易云。天道福善而禍淫。歷代三教聖賢。苦口良言。如出一轍。徵驗昭昭。何嘗欺我。要知我國四千餘年來。聖聖賢賢。所謂孝悌忠信禮義廉恥八字真言。俱是從世界人類身心性命。中發明出來之天然道德。並非憑個人私意思想出來之規矩準繩。故人能配三才者在此。能參贊化育者在此。能旋乾轉坤者亦在此。世界禍福。因此轉移。歷代興衰。由此變化。勢有必至。理有固然。是以有物質之文明。必不可無精神之調攝。譬之飲食物質。可以養生。亦可以殺生。必賴我有天然之智力。以節其慾海。方可有益而無損。况乎害人者。必不願人之害己。盜人者。必不願人之盜己。殺人者。必不願人之殺己。人能以己之心。度人之心。則保其固有之惻隱。

心。即可止其殘忍心。保其固有之羞惡心。即可止其獸慾心。保其固有之恭敬心。即可止其爭奪心。保其固有之是非心。即可止其淆亂心。無奈世人殊多口是而心非。往往昧卻同心。各生異心。失去一心。化爲萬心。心沉苦海。混濁不清。釀成戾氣。化爲惡氣。上天下地。瀰漫無垠。驚濤駭浪。怪亂叢生。生民未有。亙古罕聞。嗟嗟。以今日之人。火熱水深。或如屠門中之牛羊犬豕。或如刀砧上之鷄鴨魚腥。或如沙籠烟幕。或如醉死夢生。天理滅寂。人欲競爭。陵夷滿目。大陸將沉。雖曰金聲玉律。挽救亦不乏人。終覺燎原野火。難免杯水車薪。所望仁人君子。互相聚精會神。還我乾坤正氣。立見海宇清平。爰刊本報。藉起沉淪。謹此宣言。幸鑒愚忱。

福寧惜字會宣言 民國乙亥仲春

復初居士

世之人有不敬天地父母者乎。有不敬聖賢仙佛者乎。有不敬忠孝節義英雄豪傑者乎。一有不敬。是謂忘本。是謂異端。是謂庸夫俗子。人之欲善。誰不如我。設有人焉。指之曰俗子。目之曰庸夫。斥之曰異端。未有不艷然怒者。然則敬惜字紙。其必爲人類社會表同情。無疑也。何也。蓋字紙中有文字。文字中有造化。具有天地生成之理。父母養育之恩。聖賢之經傳。仙佛之心法。靡不筆之於書。其足爲英雄豪傑造成忠

孝節義之大事業者。舍此其奚屬耶。卽或片言半偈。斷簡殘編。亦莫不歸先聖賢創造之功用。飲水思源。豈容廢棄。而况踐踏之。污穢之者哉。本會同志。目擊神傷。本固有之良心。作惜字之運動。立會捐貲。雇丁檢拾。添爐置簍。使人貯焚。提倡責在同人。維護端賴各界。所望人同此心。心同此理。由城市而推及鄉鎮。由鄉鎮而推及各縣。各省由省而國。而天下。則斯會之設爲不虛。而惜字之效力乃大。於以報天地父母之恩。建聖賢仙佛忠孝節義英雄豪傑之大事業者。其必自敬惜字紙始。

中國儒佛合一救劫會宣言 民國乙亥年六月

潘對亮

竊洪荒初判。天地肇分。我中華自有文字紀載。遂留五千年之歷史。釋迦宣聖。皆生於周朝。一則星隕如雨。昭王有太史之占。一則麟吐玉書。五老有降庭之瑞。夫戴高履厚。同是爲人。能出生死輪迴。超乎人類。則曰佛。能明秉彝物則。立乎人極。則曰儒。故修身齊家治國平天下。儒爲世間法。三身四智五眼六通。佛爲出世間法。世間法可以範身。出世間法可以明心。世間法可以保全生死。出世間法可以解脫生死。無世間法。如水之無源。無出世間法。如花之無果。明此兩端。始可與談佛。可與談儒也。對亮上年曾聯合同仁。倡辦儒佛合一救劫會。以尊孔爲前提。首先提倡孝弟。良以

孝弟乃天經地義。爲爲人之本。加以小學鐸聲。論語鐸聲。木鐸千聲。本十三經以立其基。更印儒教作聖編。使男正乎外。儒學壹德編。使女正乎內。救劫初階。八德錄。歷史感應統紀。以廿四史參其變。終以佛學救劫編。儒佛合一。救劫編。治世間法。與出世間法。爲一鑪。以明儒佛合一之究竟。且百八鐘聲。百八和聲。更播揚極樂世界法音。以引人入勝。蓋孝弟之風。人人親其親。長其長。大同之化。不難再見。矧一人成佛。七祖昇天。如來在兜率天。尙爲母說法。故儒家言孝。小孝用力。中孝用勞。大孝不匱。又曰。爲官不敬。非孝。戰陣無勇。非孝。朋友不信。非孝。佛家言孝。梵網經則推孝父母之心。普及眾生。卽所謂冤親平等。無有高下。是孝弟之功用。固其大無外矣。昔衛武公。耄年進德。九十五歲。猶賦抑戒。賓筵自警。而考其家法。實以孝弟爲始基。對堯景。迫桑榆。時艱莫補。方欲排印二十四孝弟詩。并圖說。若干萬本。分送各省各機關各學校。使人皆爲孝弟之人。則有善無惡。太和元氣。洋溢寰區。極樂世界。庶或實現於東土。正苦會中虧累。經濟困難。而親友尙以來年對堯九十正慶。今冬生辰作祝壽之舉。吁。爲已偵矣。每思對堯命運。至八十七歲。已屆末劫。乃因兩年來節省席筵費。不殺生命。及親友壽禮。改印善書。故得天假之年。履夷出險。若再大事鋪張。約計演

劇及來賓所備禮物等費。數恐不貲。將一舉而擲巨金。徒造孽緣。彌增罪戾。何如化無用爲有用。仍照往年辦法。使諸大善士。廣種福田。同登上壽。假如集款充裕。可多印二十四孝弟冊數萬本。況會中所編救劫各書。已十餘種之多。尙擬隨時添印。美備悉臻。合儒佛之精華。極人倫之能事。果能博施濟眾。使家喻戶曉。顯愚無知。皆可聞風興起。化爲善良。將由淺及深。不愧作人。即不愧作聖。即不愧作佛。從此橫出三界。不入輪迴。皆孝弟兩端基之。則儒佛合一之功效。更可爲新生活之助力。視國學研究會。佛學研究會。及其成功同歸一致。是又對亮所黽勉從事。不敢告勞者也。再者本會自開辦籌備以來。倏經兩年。所編救劫各書。或全分贈送。或原價流通。風行海內。遠近周知。故各省函索者。日不暇給。可謂立竿見影。功不唐捐矣。擬明春公同會議。宣告成立。改名爲儒佛合一進德會。并由大眾提倡根本辦法。安定章程。爲一勞永逸之計。想亦本會會友之所願聞也。是否有合。祈裁奪而教正之。

善團啓事

甘肅岷縣郵局圖書館徵求書報啓事

張旺

謹啓者。敝地僻處邊隅。人心惡化。茲值鄙人創辦圖書館伊始。所有書籍。不應需求。

兼又缺乏金錢。以資添購。特此敬求海內仁人。大發善念。惠賜各種有益書報。俾共瀏覽。以冀稍挽惡俗。誘引爲良。如蒙關注。無任佩感。來件請寄甘肅岷縣郵局張旺查收可也。

中國保護動物會徵求會員啓事

孔庸之等

竊人類虐殺動物。實爲以強凌弱有乖正誼之事。我國古禮。有無故不殺之條。近代列邦。有禁止虐待之會。雖未能遽止殺生。而猶能節止。此固爲諸君子所熟聞也。往歲呂碧城女士輯歐美之光。有謀創保護動物會緣起一文。爲中國護生運動之嚆矢。夫種殘忍之因。卽造戰爭之禍。故世界戰爭之能消弭與否。不繫於國際之約章。而繫於人心之慈暴。勝殘去殺。非可倖求。此本會之進行。所由不可緩也。竊以人之好善。誰不如我。護生之事。尤資多助。況此會意主大同。絕不參加何等宗教成見。及何種地位主張。與會人員。徧徵各界。一致參加。用是廣求同志。慨予加入。或廣爲勸導。或設立分會。以利推行。而宏仁澤。不勝禱祝企望之至。籌備員孔庸之葉玉甫王一亭關綱之王曉籟黃涵之林康侯史量才陸伯鴻姜懷素王彬彥鍾可托田玉樹施省之牛惠生張一塵陳无我沈公謙趙雲韶朱石僧李經緯沈彬翰鄔崇音同啓

會址上海六馬路仁濟堂內章程及志願書函索即寄

慈善彙報徵稿啓事

主編者

本報自發行以來。轉瞬三載。深荷善家提倡定閱。銷數日增。茲爲充實內容。以鑿閱者起見。徵求海內大善家。大文豪。請以濃熏班馬之香管。發爲宣傳慈善之報章。敬備薄酬。聊爲潤筆。非敢有玷清廉。藉使傳神阿堵。伏冀 亮啓。

杭州國學善書館徵求啓事

籌備同仁等

敬啓者。敝館之設。原爲佐闡聖教。以明學術。救正人心。但此事關文化。殊非一隅之見。可以執行。茲適陝西商南賀君箭村。以其所編明清善果大辭典。及德藝叢刊。郵請平理。安君鑒定。并囑敝館付印流傳。以昭先民行善之實。而彰因果之由。庶導末世之人心。必期於至善之義也。然按賀君之志。殊屬可嘉。敝館同人等。緣被觸感。再四籌思。謹擬啓事。徵求

諸大賢翁之高見。賜予指導。庶獲盡善盡美之道。並決編輯賑濟回天策。及全國孝節錄二書。因乏稿件。是以不避罪責。冒昧懇祈

各省諸大賢達。悉心採訪。惠著作佳。庶成雪案之功。以宏救濟之方。且請道學兼優

之志士。主持編次。以期印行。異日功成。遍傳天下。拯救善良之策在斯。闡潛德之幽光亦在斯。挽回天心。世運咸亨。著述二書者。芳垂萬世。亦莫不在斯也。其匡扶世道人心。豈曰小補之哉。是爲啓。乙亥年重陽日

擬編中國先賢家訓叢書徵稿啓事

賀箭村

粵稽我國歷代先賢。往往將己身經驗及心得者。著爲家訓。以垂示子孫。其語皆披肝剖胆。點點是血。千載下之人讀之。尤見其血心躍然紙上。當斯家教衰替之秋。理宜將先賢之訓語。廣爲宣佈。俾世之爲父兄者。有所取法。而訓迪其子弟。爰不自揣。謹擬編輯中國先賢家訓叢書。凡中國歷代先賢之家訓。悉爲搜羅而整理之。第是薄海之大。一人難以遍及。茲特約請各地賢明。分編合作。凡篋中藏有昔賢家訓。願爲鈔錄者。祈來函告知。鄙人即將格紙寄遞。以便按格鈔錄。一俟鈔竣。郵來。即依次編纂。付石排印。庶幾先賢之訓語咸彰。而世之爲父兄者。亦有訓迪子弟之資料。即辦理社會學校。藉是以爲參考書。而提倡教導之。更屬適宜。是此一舉也。誠在所必要矣。如蒙勳助賜教。請由陝西商南富水關信櫃轉交。或由河南荆紫關轉商南富水關亦可。

善體章程

佛慈放生會章程會址北平地安門外方磚廠通明寺

一本會本佛大慈專以勸導放生爲宗旨。定名曰佛慈放生會。

一不分種族男女。宗教階級。凡贊成本會宗旨者。皆可入會。

一凡入會者。卽有勸人放生之義務。

一願入會者。開明姓名住址。函知本會登冊。以備通知放生。

一宰官逸士。文人長老。熱心利濟者。得由董事會公決。聘爲本會董事。

一本會設立職員如左。

(一) 董事若干。議決興革要件。暨聘任職員。

(二) 會計三人。經管收支款簿。暨來往函件。

(三) 庶務四人。經管置辦器皿。放生招待等事。

一會計庶務。或增他項職員。概於會員中酌聘之。

一會務年分兩期。

(一) 由二月十五至十月十五。每積捐至三十元。由會計商同庶務。擇星期

日。函知會員放生。

(二)由十月十五至次年一月止。所積捐款。印施戒殺放生等書。

一會員捐資。多寡隨意。能每月一次尤妙。送就近代收處。掣回收據。

一放生照放生儀軌。授生三歸。誦咒懺罪。

一因放生需費。均由放生款內開支。

一每放生一次。隨貼收支清單。以示公知。印施善書同例。

一本會創始。祇放飛禽水族。凡豢養之類。須候發展。添置養所。

一本章程有未妥善處。會員得具詳函。候放生日。付董事會公決。

中國放生基金會章程摘要 會址上海霞飛路嵩山路口護生報社內

一名稱 中國放生基金會。(簡稱中國放生會)

一宗旨 本會專提基金利息。每月購放生物之用。

一會員 分特等一等二等三等。均屬永久會員。

四會費 特等。出銀五十元。及五十元以上者。

一等。出銀十元。及十元以上。五十元以下者。

二等。出銀五元。及五元以上。十元以下者。
三等。出銀一元。及一元以上。五元以下者。

以上四等。均發有基金收據及五色會員證書各一紙。

五利益

特等。奉送紅木座架銀盾一具。綾表名人親筆書畫立軸一幅。及加題加刻紀念詞。並永久贈閱護生報。

一等。奉送名人親筆綾表立軸一幅。並加題紀念詞。及永久贈閱護生報。

二等。贈閱護生報五年。及勸善刊物。

三等。贈閱護生報二年。及勸善刊物。

本會會務由護生報社人員義務辦理。無房飯薪俸等開支。除必不可省之用途。所有收支賬目。每月於護生報上報告。

七介紹

一凡介紹會員捐額在三個月之內達二百五十元者。本會特具聘書。聘爲該地分會會長。加增第五條利益項內之特等贈例。並由本會不時撥款。請該分會會長。在就地視合適當購放生物。代爲辦理之。

二凡介紹會員捐額在三個月之內達一百元者。本會特具聘書。聘爲本

會高等顧問。加贈第五條利益項內之特等贈例。
三凡介紹會員捐額在三個月之內達五十元者。本會特具聘書。聘爲本會一等顧問。加贈第五條利益項內之一等贈例。
以上三種。對於會員自行加入者。恕不再事贈品。

入附則 本簡章如有未盡善處。得隨時修改之。

任印善書文誼會徵求會員簡章會址江蘇鹽城北街

第一條宗旨 本會以聯合同志。印送覺世牖民書籍。發揚道德文化爲宗旨。

第二條名稱 本會定名曰任印善書文誼會。

第三條會員 會員入會時。先填志願書。其種類有四。贊助大洋二十元印書者。爲

甲等會員。助十元者。爲乙等會員。助五元者。爲丙等會員。助一元者。爲丁等會員。不論男女。歡迎加入。收款專備印書。不另支用分文。

第四條職員 本會公選臨時會長五十人。撰述員十人。宣導評議各五十人。均名譽職務。

第五條會務 本會暫以施送印光法師鑑定之杯渡齋文集。務本叢譚。省餘存稿。

鴻嗷輯。俟會費擴充。再圖添印他種書籍。

第六條聘任

凡各機關公務人員。贊成本會宗旨者。均得函聘爲名譽會長。

第七條通知

每印一種書。必經大會通過後。卽於兩月前。出單通知各會員。量力贊助。並不向外募捐。

第八條優待

會員常年。受本會贈閱書籍之利益。助洋一元印書者。卽贈書一年。多出照此類推。如須對聯裝潢雅室。本會當代請名家郭介梅先生書贈。

第九條任期

本會各職。以三年爲一任。期滿被舉。仍得連任。

第十條公佈

本會所收各會員之印書費。除給收條外。並將芳名及助款數目。一律於書後列表。刊帳公佈。俾昭大信。以誌不朽。

慈善彙報投稿簡例

一本報爲匯參三教。提倡道德。宣揚慈善之惟一刊物。內容約分下列各項。

(甲) 論說。不拘題面。以宗旨純正。不落偏奇爲主。(凡妄誕不經。或執中無權者。不錄)。(乙) 經典匯參。以發明三教性道。確有心得爲主。(凡與三教宗旨

不合、或莫明其妙者、不錄、（丙）八德紀事。以指陳最近實行。闡揚潛德爲主。
（凡不合中庸。或泛而無當者、不錄、）（丁）果報述聞。以確見確聞。事實新穎
爲主。（凡攻發陰私。或捏名造言者、不錄、）（戊）善門常識。（己）養生叢錄。
（庚）慈善模範。以上三類。以切合題旨爲主。或審題未盡準確。而其文有足錄
者。則歸入下列之。（辛）善家著作。（壬）隨筆雜記。（癸）附刊專件。欄內。
二來稿以明白曉暢之文言爲主。（白話亦可）務須用墨筆繕寫清楚。自加句讀。
轉抄之件。須詳註其書名。（或已刻、未刻、）及原著作人姓名籍貫時代。
三投稿人。須開明通用姓名。（刊稿時用真姓名、或別號、請隨時聲明、）詳細地址。
以便通信。稿內務須署名蓋章。（如未蓋章、即認爲却酬、）
四投寄之稿。登載與否。恕不奉復。原稿亦不發還。（惟附有還稿郵費一角三分者、
可以退還、）選登之稿。本報有酌量增刪之權。
五投稿登載後。本報酌酬現金。或本報特製箋封。及本報全年一份或多份。（其數
目隨本期報附書通知。倘書報或需轉贈他人。請將收件人姓名地址開來。亦可
代寄、）

六投稿人於來稿登出一月後。尙未收到通知書。以及酬資或書報。卽請來函查詢。但以三個月內爲限。（逾期本報不負追查或補發責任。）

七投稿請郵寄上海愷自邇路明善書局。慈善彙報編輯部。重要稿件。或附有還稿郵資者。概須掛號寄遞。以免郵誤。

湖南邵西救生會簡章

- 一本會以救生慈幼。尊崇人道爲宗旨。定名爲邵西救生會。
- 一本會暫假集仙宮爲會址。不設機關。遇事由正副會長召集會議。
- 一本會公舉正副會長各一人。主持會務。執行救生各事宜。呈報政府。
- 一本會公舉會董若干人。分管各處錢穀。訪查報告貧苦女嬰等事項。
- 一本會會長會董。純盡義務。每年終。由會長彙總救生名口。收付會金數目。列表開會審核。轉呈 縣政府。并張貼公布之。
- 一本會職員。如有假公飽私。查報不實情事。公同斥退。并予以重罰。否則呈請政府追究。
- 一本會職員任期。不定年限。有故得隨時調選。

一本會基金。由會員樂捐田地。錢穀。並酌提各公私會產。親書捐簿。捐契。存案勒石。以垂不朽。

一本會會產。須陸續籌集擴充之。

一本會發給穀款。以救極貧溺女爲先。額定每口給穀三石。錢六千文。次貧者。給穀二石。錢四千文。均以半年爲期。由產戶報明。附近會董查確。并有士紳三人署名簽押介紹。給予認可證書。轉向會長換條。按月向附近會董請領錢穀。如有生產不報。暗行溺斃者。由會長報請政府。按法重懲。

一本會會租。由本處捐員。與會長等。共同選舉會董管理。不拘名額。如有善士仁人。願助款加入者。一律歡迎。

一本會呈准。縣府禁止宰屠耕牛。如違。責罰。拘案送懲。

一本會已呈。縣政府備案。

一本會簡章。自成立日施行。如有未盡完善。得隨時會議更正。呈請備案。

陝西省孔教會簡章

一定名 本會定名爲陝西省孔教會於省會孔廟內設事務所

二宗旨 本會以昌明孔教救濟社會爲宗旨

三會員 凡誠心信奉孔教之人無論士農工商皆得填具願書由會員二人之介

紹得認爲本會會員發給證書以資證明

四會務 本會會務遵照總會規定分講習部與推行部

甲講習部內分四類

子 經學 丑 理學 寅 政學 卯 文學

乙推行部內分四類

子 敷教 (講道化民) 丑 養正 (拜聖讀經)

寅 執禮 (考禮正俗) 卯 濟眾 (仁民愛物)

五會規 本會會規依總會規定教規五條白鹿洞學規五條呂氏鄉約四條以資

遵守

總會教規

一 祀天祀祖祀聖以崇三本 二 念聖念經以斂五福

三 致中致和以立一貫 四 出貨出力以行大同

五 養名養魂以至極壽

朱子白鹿洞學規

父子有親 君臣有義 夫婦有別 長幼有序 朋友有信

右五教之目 堯舜使契為司徒敬敷五教即此是也學者學此而已而其所以窮理也若夫篤行之事則自

博學之 審問之 慎思之 明辨之 篤行之

右為學之序 學問思辨所以窮理也若夫篤行之事則自修身以至於處事接物亦各有要其別如左

言忠信 行篤敬 懲忿窒欲 遷善改過

右修身之要

正其誼不謀其利 明其道不計其功

右處事之要

己所不欲勿施於人 行有不得反求諸己

右接物之要

藍田呂氏鄉約

德業相勸 過失相規 禮俗相交 患難相恤

衆善快覽

六會期

本會每年開大會一次於大成節_{孔子聖誕}前三日在孔廟開會其常會於每

月朔望行禮後研究進行各事由會董主持之遇有要務臨時招集

七推舉會長

本會正副會長於比年開大會時舉正會長一人副會長二人用投票法或推舉之會長任期一年如辦有成績得公推續任一年

八會董

本會於公舉會長後由會員推舉會董十人或八人依第六條辦理

九會費

凡入會者每人納入會費一元凡會員每人納常年費一元若會員於常年費外及非會員而捐款贊助本會均極歡迎常年捐外推廣會中事務得另行募捐以期積有基本巨金實行推行部事務

十職員

本會由正副會長提倡會務外暫定文牘庶務交際各二人執行會內一切事宜酌給津貼

十一分會

本會設立省會爲提倡孔教起見須推會員分行組織各縣孔教會使孔教徧行各縣一面聯絡各省孔教會同力合作推廣會務於東西洋各國以期世界孔教會之聯合成立

十二責任

董事職員各有應盡職務如於開會時歷三次不到者卽由董事別推

會員補充

中華民國十九年十一月改訂

陝西省孔教會設立國學講習館簡章

(一)名稱 本館依據孔教總會章程分設講習部之規定並參酌現時學術應用之需要設立之定名為國學講習館

(二)宗旨 本館以講明我國固有之道德學術養成體用兼備之人材為宗旨

(三)館址 孔教會東邊崇聖祠

(四)學科 依照總會定章統分為左列四科其詳細課目隨時酌定之

甲經學 首先講習孝經論孟學庸以漸及於羣經要以講明大義期於明體達用為準

乙理學 首先講習小學近思錄次及性理精義理學宗傳等書務使深造有得灼知儒者本末要旨

丙政學 修己治人在儒者本同條共貫但對於政術平日若不切實研究則他日臨政或涉迂疏故須先考求我國政治之準則歷代政治之變

遷及現時政治之需要庶幾學古入官坐言起行不失修齊治平之主旨此外古今各大政治家之學說及各種文牘文字之體例亦在本科講習之列

丁文學

漢之小學爲文學唯一之門徑其古今各種文體及古近體詩歌亦須實地練習以期理明詞達切於實用此外書數列於六藝爲日用之需要故講習書法練習珠算務求純熟以爲應用之準備以上各科如有限於資質才力不能兼詣願擇一二科期於專精者亦可從便但須於入館時預先填注

(五)畢業

普通三年畢業願深造者得仍在館內研習

(六)招生

甲 資格以品性端正文理明順者爲合格

乙 年齡十五歲以上

丙 學費年分二學期每學期每生入館預交學費洋六元書籍文具自備

丁 膳宿在館內者其各費自備如不在館內食宿者聽便

戊 額數招考時酌定之

(七)附則 本簡章自呈准備案之日施行如有未盡事宜得隨時修正之

中華民國二十一年

月

日

善書序跋

重訂得一錄序

江蘇無錫唐文治字蔚芝

人性皆善也。而吾國之國性尤善。孟子道性善。告滕文公彊爲善。申言之曰。今滕截長補短。將五十里也。猶可以爲善國。所以善國性也。然而徒善不足以爲政。徒法不能以自行。既有善人。必當力行善法。然後充塞於宇宙。而國乃可以大治。吾鄉先哲余蓮村先生。彙集先儒義莊、保嬰、恤廢、清節、儒寡、養老、義倉、救荒等一切章程規條。都十六卷。名曰得一錄。今年春。吾友楊君章甫。蔡君兼三。復加重輯。廣爲印行。以爲積善者之矜式。嗚呼。二君之意深矣。昔周文王發政施仁。必先鰥寡孤獨。後世傳其法。略見於周禮禮記二書。蓋三代以上。爲善之責在君相。漢唐而後。聽民之自治。於是爲善之責在社會。然必道一風同。上下絕無隔膜。而後善舉得以維持於久長。孔子曰。善人爲邦。勝殘去殺。此根本之論也。而余更有進焉者。易傳言積善之家。必有

餘慶。積不善之家。必有餘殃。又曰。善不積不足以成名。惡不積不足以滅身。小人以小善爲無益。而弗爲也。以小惡爲無傷。而弗去也。故惡積而不可掩。罪大而不可解。夫積善積惡。餘慶餘殃。成名滅身。惟在一念之轉移而已。易又言精氣爲物。遊魂爲變。蓋言人生魂魄之聚散。卽國家魂魄之聚散也。人性善。則國魂甯。人性惡。則國魂失。然則國家之治亂興亡。實在於國性之善否。而國魂之聚散係焉。豈不危乎微乎。楊蔡二君之重輯是書。蓋欲吾國善士。奉之以爲圭臬。各就地方情形。規模大小。經費盈絀。而力行之。而變通之。而擴充之。庶幾乎人性善。國性善。國魂可復。而國家亦可永保矣。夫。民國二十三年甲戌春。蔚芝唐文治。敘於無錫國學專修學校。是書上海

關路二二九號人文印書館印行每部實洋二角七分外埠加郵費五分

精神錄序

吳興王震宇一亭

驅世俗於刁敝易。挽世俗於醇正難。此崇善人士。鑒於今日之社會。不能不痛心疾首。呼號奔馳者也。臺南陳江山先生。蓄道德。能文章。平居以慈善爲懷。如屏東修養會。救護院等。俱一人主持。不辭勞瘁。而本會之發展。尤賴先生贊助爲多。今乃復有精神錄之作。將以箴此情之澆薄。砭人心之險惡。其用心何其密耶。先賢有言曰。修

身齊家治國平天下。蓋欲平天下先治其國。欲治其國先齊其家。欲齊其家先修其身。此書之出。行見直接修其身。間接齊其家。更擴大而治國平天下。皆在其中。顧不可寶哉。會索序於震。謹書數語簡端。以誌景仰云。中華民國十九年三月吳興王震識於上海中國良心崇善會。

是書板存臺灣南州嘉義市西門外一五九號蘭記黃茂盛處願印送或欲索閱請與蘭記接洽即可

溫光熹先生嘉言錄序

桂林吳步燮字韜庵

溫光熹先生。蜀之成都人。生有夙根。剛訥寡言。弱年焚膏苦學。聲振翰苑。著禮運大同辨。問孔後案等書。諸宿儒俱推爲兩鄭後有功孔孟之作。未及頽年。游心內典。笑止息於化城。誓舟航於彼岸。早年著述。概付一燔。自是不以文字迹相示人。庚午行脚。吳越間。與諦閑頭陀等交游甚契。燮於普陀相遇。同之鄮山。禮育王舍利。蕭寺秋燈。夜譚達旦。振襟危坐。眉間英氣。照人耳目。極人生之大致。披肝露膽。情見乎詞。親近浹旬。領益良多。燮自遂初服。輒輯先聖賢修齊治平之言。以訓兒輩。殆俾於治物質科學之餘。知有爲人之道耳。先生手札。遍於大江南北。海內賢達。印佈甚夥。燮得則藏之。不覺累帙。每誦一過。如饑渴者之得甘露。歡喜贊歎。曷云能已。因感鄮山領益之緣。不揣葑菲。妄事決擇。刪繁就簡。編爲私藏叢書之一題曰嘉言錄。共一卷。分

上下二編。凡五十有七則。上編多談佛法。注重淨業。下編多談世法。注重人倫。以尊崇佛法。並表世出世皆佛法之義。故佛法大致編於前。世法大致編於後。計上下二編之綱領。於世出世法之大致。略攝其要。即欲人人人生爲聖賢之徒。死爲極樂嘉賓之意。生死大事已明。餘則舉一反三。人生之大致不外是矣。第以精神無多。不及詳爲分門編次。不免挂漏。未敢孟浪問世。會同寅葉公威鳳。敷歷歐美。萃於科學。返求已有文化。見而好之。且曰。熹先生眉毛拖地。真實不欺。教人知因識果。盡分盡誼等義。行之久久。自能敬畏。不敢作惡。既令質地無虧。復教護生念佛。不知不覺。即凡情以成聖智。斬斷葛藤。透脫已極。丁茲叔季。導俗之書。唯恐不多。吾子何可過懷僞損。以此智炬掩而不彰乎。因出鶴俸。促即剞劂。廣施寰宇。區區此冊。以視先生全部法言。固猶大海一勺。然若能遵行。所得利益。當無異窺其全豹。茲因災梨在卽。略誌緣起。藉揚葉公之勝願。用以戒勸同倫云爾。民國二十二年歲次癸酉姑洗上浣桂林吳步鑾韜庵父撰於香港芝蘭別墅

是書上海霞飛路嵩山路口道德書局
印行每部價洋精裝五角平裝二角

鴻嗽輯振災篇序

江蘇成靜生字翊青

歲庚午。余識鹽城郭君介梅於南京慈幼院。氣清而意簡。心竊異之。然未知其嗜義

若渴也。別後不復再晤。辛未秋潦。鹽淪爲巨澤。楊君晉卿往主振事。復爲余言介梅振鹽災。遇災民胥吏。輒絮絮談因果。因更異之。客夏書來。且郵示所著務本叢譚。杯渡齋文集。省餘存稿諸書。乃知其悲天憫人救世之心彌切。拯災恤患。操有仁術。而一以因果爲歸。比復郵其鴻噉輯新著。督余序甚亟。不獲辭。按是輯多爲義振語。亦歸之於因果者。蓋卽介梅之仁術也。昔仁和陸曾禹輯救饑譜。倪國璉檢擇精要。上之清高宗。更名曰康濟錄。頒佈郡縣。定爲典則。然未協於義振也。義振之法。創於嚴佑之潘振聲兩先生。自吾師馮蒿齋丈益昌大之。時尙未有專書也。寶應劉朴生兄爲馮門高弟。畢身精力。盡瘁於振。遂有義振芻言之作。自此義振有專書矣。朴生經驗宏廓。故其著簡賅適用。蔚爲無上善策之善策。實吾師成規之所繫。后之言義振者無出其右。今介梅雖於本省歷賑未多。而於直魯湘皖辦理濟災事業。頗有成績。故於賑務而能雅有闡發。且寓振災於因果。爲時下一鍼砭。用心誠不可及矣。願後之救災者人手一編。驚心觸目。知天之可畏。而事之不可不敬。俾於朴生所著規箴。窺模不敢或越。義振一脈。庶乎不墜。則斯輯豈不爲有脚之陽春歟。甲戌春日汜光田父成靜生識於葑溪草堂。

是輯江蘇鹽城北街任印善書文誼會印存案閱者付郵十五分即寄

養生鏡序

浙江餘姚楊瑞葆

人之心思運用過度。必致虛弱成病。故善養生者。常使心思靜如止水。空若太虛。無事則淡焉漠焉。生趣盎然。遇事則毅然決然。當機立斷。若而人者。其身心必康健。而事業亦必有可觀也。吾國言養生之書甚多。其大要不外乎靜與動。體操拳擊之類。動之養生法也。參禪靜坐之類。靜之養生法也。然所靜者。靜其心也。若靜其身。而不靜其心。庸有益耶。所謂動者。勞其體也。若勞其體。而復勞其心。鮮不危矣。揚州石天基先生著傳家寶一書。凡立身養生治家處世之道。莫不備載。其論養生也。心思則歸於安靜。房事則歸於節制。飲食則不令恣肆。起居則務期謹慎。醫藥則惟其及時。可謂盡養生之道。而無餘蘊矣。惜全書卷帙浩重。木刻漫漶。坊間石印本。字跡既小。復多錯誤。閱者苦之。不佞屢思重訂印行。而力有未逮。茲幸同人。有明德書局之設。而愛華製藥社。又有贈書之舉。爰將書中。長生祕訣。真益賤。救命針。快樂原諸篇。重加纂訂。顏曰養生鏡。藉爲世人修養之一助焉。時中華民國十一年四月

按明德書局附設上海望平街愛華製藥社內是書每部實洋一角

救世實言序

遂昌王昌杰

甚矣學說之有關於世也。中國大亂數十年。天災人禍並至。學說害之也。彼輩既憑偏。詖學說以禍世。吾輩豈可無真正學說以救世哉。故予於遜清戊戌。有修身錄之著。民國紀元。有小學生箴言之編。辛未。又有醒世淺言之刊行。近今世變日亟。世禍亦深矣。再不挽救。流害伊於胡底。故去歲辛未。更有救世實言之撰述。然文成於倉猝。未敢印以問世。朋輩屢次慫恿。謂醫國妙劑。救時金針也。乃選三分之二。付之石印。嗚呼。學術正則人心正。人心正則政治風俗正。各界三復此書。自有以消劫運於無窮。醞釀將來唐虞之盛治。斯書流行於今日。或未必無小補乎。書成。因敘數言於簡端。以誌緣起云。民國二十一年歲次壬申。遂昌正實子王昌杰謹識於蓮峯講舍。

是書上海法界嵩山路口明善書局印行。每本價洋四分。

省餘存稿序

盧興邦

沿永安之西岸。在水一方。出鹽瀆之北郊。計程六里。平原蕩蕩。低隰茫茫。千頃黃雲。幾灣碧水。見竹林之一帶。繞茅屋之數椽。村人告余曰。此郭慧震居士之廬也。居士其存誠樂善之古君子乎。經守明誠。默寓至誠之道。隱居獨善。廣求兼善之途。種德福田。性禾善米。發祥文苑。慧果靈根。悲天憫人。悟尼山一貫。養氣持志。擴鄒嶧四端。

大同抗三代之英。眾好成一鄉之善。忠義爲之披瀝。肝膽俠豪。慈悲於以感孚。心腸菩薩。仁山何峻。愛嶽何高。慧海何深。法門何大。何賢關之廣闢。何聖域之宏開。眾生引渡迷津。航輕一芥。羣彥遵循覺路。臺散千花。異語之流行。可傳可法。恆言之昭著。式玉式金。唐哉皇哉。善矣美矣。振發一時之耳目。拓開萬古之心胸。邦夙佩貺音。素欽雅訓。俯慚末學。仰荷先施。東野爲雲。傾心相向。南州見雪。俗目都驚。手撫芸編。何敢弁髦以視。氣清蘭佩。不辭冠首以言。同詠霓裳。聽眾仙之法曲。皈依霞衲。選千佛之名經。中華民國二十二年歲次癸酉仲冬月之上浣陸軍新編第二師師長盧興邦光國謹撰

青年修養箴言序

江蘇南通 陳慧昶

欲治其國。先齊其家。欲齊其家。先修其身。昔賢立言。洞燭扼要。言簡而義該。提綱而挈領。爲治世之名言。立身之南鍼。苟人人能三復斯言。使身修家齊而國治。得共享太平安樂。則何善如之。惜今之人。舍本逐末。競採異說。雜沓紛紜。以盲引盲。扶道德之藩籬。而侈談文明。傷社會之風化。而妄求解放。敝履聖賢言論。磨滅青年良知。流毒所至。甚於洪水猛獸。則安望其身修家齊而國治哉。本社有鑒於是。爰輯青年修

養箴言一冊。彙錄陽明朱子敦品修學之說。及各家養身名言。蓋欲使吾可愛之青年。得正確之指導。使其有健全之體格。優秀之品學。在國爲循吏良員。在家爲賢父母佳子弟。則家齊國治。不亦易哉。是皆基於人人能修養其身心之功效也。負有教育之責者。及吾可愛之青年。幸勿忽諸。民國二十年辛未暮春南通陳慧昶謹序於蘇州弘化社

鴻嗷輯跋

江蘇阜寧丁健康字壽岩

郭子所著鴻嗷輯一書。上下千載。經緯萬端。余參校甫竟。輒慨然歎曰。古云。救災無善策。而救災之事。豈易言哉。義粟仁漿。皆仁人之德澤。任其事者。宜如何籌劃。務使款不虛糜。災民沾其實惠。然往往用人難得其賢。既得人矣。更苦於借鏡無方。其老成練達而賢者。於查放方面。得當多而遺濫少。不肖者真不堪問矣。佛言。不可說。不可說。其此之謂乎。夫賑款來源。經海內仁人呼號湊集。原非易易。又爲災民生死之所關。豈不重且大哉。輯中所載查放方法。悉親身之經驗。綱舉目張。瞭如指掌。依此而行。自無隕越。此救災於已成者也。上卷皆宏教明倫。念佛懺悔之要端。行之可以弭劫。故災劫之降臨。雖由眾生共業所召。各有深淺不同。然既浸潤佛法。回心向善。

則我佛之大慈。未有不廣爲加被。此救災於未成者也。由此觀之。郭子之志高。其行潔。其性慈。故仁術多端。其用心亦良苦矣。余不禁爲賑務前途慶。更爲災民喜得救星也。爰書數語爲之殿。

陸放翁家訓跋

湖南衡陽聶其杰字雲台

右放翁家訓。雖僅數頁。然頗足針砭時俗。有裨政教之文也。然放翁之詩。世人知之。而其道德學行。經濟謀略。世少知者。古來詩人。多爲吟風弄月之詞。或作酸悲短氣之語。惟放翁則多爲見道訓俗之言。其憂時愛國之忱。多發之於詩。然膽氣豪壯。足以喚醒愛國心。梁任公嘗有絕句稱之云。集中十九從軍樂。千古詩豪一放翁。蓋值宋之中葉。金人據有中原。中國民氣萎靡不振。以和議苟安旦夕。放翁不得已。乃藉詩以抒其憂憤壯懷。且以勵國人也。其晚年示兒孫句云。王師北定中原日。家祭毋忘告乃翁。足見其氣概矣。此篇所訓。大抵爲身後事。其要點有二。曰儉。曰禮。世俗習於侈奉。自古已然。古聖賢提倡儉約。皆爲救正時弊。孔子答林放問禮曰。禮與其奢也寧儉。喪與其易也寧戚。記曰。國奢則示之以儉。國儉則示之以禮。近時惡俗。每藉婚喪炫其豪富。一日費至數萬。或數十萬金。社會崇尚洋貨。爭新鬥異。十餘齡之女

學生。非著長絲襪高底鞋。則自慚形穢。貴人妻妾。更無論矣。所費既奢。其金錢來源。遂不可問。古語曰。惟儉可以養廉。今社會之奢至此。官吏能否廉潔。政治能否清明。無待論矣。放翁自其高祖。已位至太傅。貴極矣。厥後數世皆顯宦。今觀其所言。祖若父貧狀。與寒素無異。放翁亦自居官數十年。晚年家居。躬親稼穡。屢至忍飢。孔子曰。君子固窮。又曰。飯疏食飲水。曲肱而枕之。樂亦在其中矣。又稱顏淵一簞食。一瓢飲。在陋巷。人不堪其憂。回也不改其樂。夫豈惟是得其樂而已哉。蓋獨立不倚之精神。必從刻苦自勵之操行而出。古人教人。必自損抑。自刻苦。自齋約。皆今人所視爲消極道德之事。而不肯爲者。而不知世界歷史中大建設之人物。皆從消極道德產生。未有不消極克己自制。而能積極福國利民者。然則此訓。今世之藥石也。今後新社會。居處之奉雖奢。其於喪葬。不憂其過費。而慮其易而廢禮。昔之祭祀禮儀。在新人物。已視爲無意識。將在廢棄之列。清明掃墓。中元追薦。生忌設供。行將不講。此數事日本全事然古人豈好爲此無意識之事哉。蓋藉祭禮以引起孝思。孝思者報恩心也。國尙謹守不廢以此培養人民忠厚之同情心。故曰。慎終追遠。民德歸厚矣。化人類私欲自利之心。以歸於忠厚慈恕。舍此禮莫由也。放翁所訓。適於儉與禮二者。鄭重言之。其於現有

之陋習。今後之弊俗。或稍有補救乎。此則予刊此編之意也。民國二十年

按放翁家訓附錄於

揚州報國寺弘化社印行

善事廣徵

東漢郭泰。字林宗。好獎拔士類。多所成就。茅容避雨危坐。勸令就學。孟敏破甑不顧。亦勸令就學。更拔申屠蟠於漆工。識瘦乘於門卒。其餘或出屠沽士伍。因獎進成名者甚眾。賈淑性險仄。爲里邑患。泰遭母喪。淑來修弔。旣而孫威直至。見泰受惡人弔。不進而去。泰遽追謝曰。賈子厚誠實凶德。然洗心向善。仲尼不逆互鄉。故吾許其進也。淑聞感愧。卒爲善士。後黨禍作。名士俱被禍。而泰以隱惡揚善。獨免世網焉。

陳實。字仲弓。東漢太邱人。平心率物。鄉人爭訟。輒求判止。實爲諭以曲直。開以至誠。皆感動。至曰。甯爲刑罰所加。毋爲陳君所短。有盜夜入其室。實陰見不發。呼子孫訓曰。人不可不自勉。不善之人。未必本惡。習以成性。遂至爲非。梁上君子是矣。盜驚投地歸罪。實徐譬之曰。視君狀貌。不似惡人。宜深克己反善。此當由貧困。遺絹二疋以歸。自是邑無盜者。累徵不起。卒年八十四。

管甯。字幼安。嘗避地遼東。公孫度設館待之。不就。廬室山中。鄰有牛暴田。甯爲牽牛

着涼處牧之。牛主大慙。里中男女共汲一井。爭先有鬪者。甯多買汲器。置井旁待之。既聞乃各自悔責。所居故舊鄰里有窮困者。家不盈擔石。必分贍救之。與人子言孝。與人弟言悌。與人臣言忠。貌甚恭。言甚順。名行高潔。望以爲不可及。而卽之熙熙。能因事以導人於善。慚之者無不化焉。

龐統。字士元。性好人倫。每所稱述。多過其才。或咎之。士元曰。方今雅道凌遲。善人常少。不美其談。卽聲名不足企慕。而爲善者寡矣。今拔十得五。猶得其半。而可以崇邁世教。使有志者興起。不亦可乎。人服其言。

宋時程一德。粗知字義。孜孜欲人爲善。每遇嘉言懿行。輒刊刻施人。使世警悟。一夕夢梓潼帝君語曰。汝有善念。諸刻俱錄報天庭矣。自此三教典籍。不學而曉。子孫悉俊拔。多高第。明道伊川二程夫子。皆其後也。

黃兼濟。成都人。張詠知成都時。夜夢紫府眞君接語未久。忽報西門黃兼濟至。見幅巾道服入。眞君降階接之。列坐詠上。至旦訪得之。果夢中所見者。因問平生所行何善。以致眞君禮遇如此。黃曰。初無善事。惟黍麥熟時。以錢三百緡收糶。至明年禾黍未熟。小民艱食時。糶之。價值不增。升斗如故。在我初無所損。而小民得濟危急。張公

歎曰。此宜坐吾上也。令吏掖而拜之。黃後無疾而逝。子孫大顯。瞿嗣興。常熟人。仁慈篤厚。歲歉。有貧人糴粟。受其錢五百。佯忘曰。汝錢十百耶。倍與之。凡負販者。必多償其值。家人怪問之。曰。彼胼手胝足。求升合利。吾忍與較耶。自少至老。爲善之念。未嘗少怠。壽九十八。二子一孫同登科。

明楊翥。字仲舉。篤行不欺。仁厚絕俗。善處人所不堪。鄰人作屋。簷溜落其家。家人不能平。翥曰。晴日多。雨日少也。鄰人產子。恐所乘驢鳴驚之。卽售驢步行。田家侵其地。址有溥天之下。皆王土。再過來些。也不妨之句。嘗夜夢食人二李。旣覺。深自咎曰。吾必且盡義利心。不明。故至此。不餐者三日。

姚三非。博學善詩文。館於懷氏。有女常窺之。姚岸然不顧。一日。晒履於庭。女乃作書納其中。姚得之。卽託以他事辭歸。袁怡杏作詩詠之。有一點貞心。堅匪石。春風桃李莫相猜之句。姚不受詩。且答書自辨無此事。生子諶。及孫錫。皆登進士。

趙康靖公。嘗置瓶豆於几案間。每一念起。必隨善惡以豆別之。善則投一白豆於瓶。惡則投一黑豆於瓶。初則黑豆絕多。旣而漸少。久則善惡二念俱忘。瓶豆皆棄而不用。

漢景帝時。山東黃河崖。有傅姓長者好善。年五十無子。生四女。皆明慧知禮。壽日觴父。父曰。吾五十無子。奚壽爲。四女愀然曰。父期於子者。爲終養計也。兒卽女。亦可代子職。養父母。明日俱改男子裝。共矢不嫁。以侍其親。讀五經百家。博覽奧義。如大儒。間則行善事。德化洽於鄉里。庭前古柏樹。葉生龍爪。樹身生鱗。金色燦然。鄉里咸駭異。以爲孝感所致。如是者三十年。一日天神鼓樂降於庭。樹化爲龍。載翁媪及四女上昇而去。里人感之。遂建四女祠以祀。

美國總統林肯少時。父湯思麥。受地懇荒。母南雪夫人。親教讀書。家貧。以木葉爲紙。鵝毛管爲筆。恆教其敬禮愛國之人。不可殘殺動物。及病革。詔林肯曰。余別爾逝矣。余知爾能孝爾父。其勉爲善人。林肯泣識不敢忘。後爲總統。勛德蓋世。每曰。余得力於母教也。

明陳毅軒爲諸暨令。嚴禁民間溺女。又念民苦嫁資。爲定上中下三等。議婚時卽約定。夫家不得爭厚薄。民甚便之。其俗遂化。辛丑覲歸。同子仁錫宿泰山。夢神授詩四句云。拯溺婆心苦。全生善果成。無慚民父母。瑞氣杏林盈。天啓壬戌。仁錫探花及第。明吳鳳岡五十無子。蓮池大師勸其行善。吳曰。吾貧不能行善。師曰。功過格上有許

多不費錢的善事。爾可受持。爾能持齋戒殺。盡心教學。不誤人家子弟。路見字紙米穀必拾起。見蟲蟻不忍傷。遇衰老殘疾乞丐。卽施一文二文錢。一碗半碗粥。口中時時說因果報應好話。勸人爲善。今當荒年。宜格外出力。救得一人是一人。救得十人是十人。多抄救飢方。治疫方。傳貼。廣勸施助。此皆貧人可行之大善事。鳳岡遵師訓。力行不怠。後享高壽。生四子。二登甲榜。

蘇國慈善家海利氏。以鍛冶起家。至鉅富。嘗立海利慈善院。教育貧兒。其後慈善院之基本財產。日益增加。該地少年男女。受慈善教育者。達四千餘人。

元許文正公衡。官國子祭酒時。所選弟子皆幼穉。公待之如成人。愛之如己子。出入進退。嚴若君臣。其爲教。因覺以明善。因善以開蔽。相其動息。以爲張弛。課誦少暇。卽令習儀。少者習拜跪揖讓進退應對。長者習射或投壺。負者罰讀書若干遍。久之諸生人人自得。尊師敬業。咸知三綱五常之道。

明中山王徐達破平江。令將士曰。掠民財者死。毀民居者死。離營二十里者死。吳人安堵。平元都。禁士卒無侵暴。吏民安居。市不易肆。素善拊循。與下同甘苦。士無不感恩效死。故所向克捷。所平大都二省會三郡邑百數。閭井晏然。民不苦兵。歸朝之日。

單車就舍。延禮儒生。談議終日。雍雍如也。太祖嘗稱之曰。受命而出。成功而旋。不矜不伐。婦女無所愛。財寶無所取。中正無疵。昭明乎日月。大將軍一人而已。

明吉水羅慶同。以市藥爲業。有買藥者。必與善品。不能償者。不强索。雪夜。有貧生爲母市藥。出釵爲質。羅問此誰物。生以母對。羅曰。母已病。聞失釵。必不悅。是益其病也。卽取藥。並釵付生。雙泉念庵兩先生。其後裔也。

南昌黃俊民。觀察家。本中資。性好善樂施。偶散步郊野。見古寺中。積板纍纍。板破骨露者甚多。遂捐高田二十畝。施爲義塚。並出資勸人營葬。凡年久而無力者。皆葬之。各爲立碑記。備人尋覓。共葬四十六棺。似此掩骼高義甚多。後其家科甲蟬聯。冠蓋不絕。

英人巴克幼時。嘗撥石擊池魚爲戲。忽覺胸中有物。似制之。使勿再擊者。巴克大驚。急返家告其母。問胸中何物。母曰。是呼爲良心者。吾輩每當善機觸發。此物卽躍然於胸中。汝慎守勿失。斯爲良善之人矣。

陳鑑父孟玉好善。重五穀若珍寶。嘗登廁。見有鍋底飯一片在廁傍。拾起滌淨食之。是夕。夢帝君曰。汝好善。惜福如此。當賜汝貴子。以光大門庭。尋生子僖敏。公仕至太

子太保。

摩爾根者。美國之銀行大王也。頗尙慈善之舉。嘗投百萬巨貲。建商業學校於紐約。捐二百萬圓於哈瓦脫大學醫學部。助百萬圓於塞多喬寺院。助二百七十萬圓於塞多喬病院。助百萬圓於露米斯病院。助二十萬圓於青年會。助二十萬圓於圖書館。助二十五萬圓。以築成哈脫梭河岸之鐵棚。其他金額難以詳記。總額達一千萬億圓之巨數。

嚴世期。性好善。同里張邁等三人。各產子。歲饑。欲棄不舉。世期往救。分衣解食。以贍其乏。三子並得長成。宗親嚴宏。鄉人潘伯等。十五人。荒年饑死。露骸不收。世期買棺殮埋。存育孫幼。詔榜門曰。義行嚴氏之閭。免其徭役。蠲租稅十年。載宋書孝義傳。福建林承美。自幼失父母。寡守節。撫養長大。畢姻而卒。承美思親涕泣。無從報答。遇一禪師曰。孝子思親。但哭奚益。惟放生戒殺。篤行陰德。諸惡莫作。眾善奉行。纔可報親。子在親。還在。子亡親自休。作善親有益。作惡親有憂。承美省悟。立誓戒殺放生。勤行善事。後子孫登第。壽年九十六。

清湯文正公斌。巡撫江蘇。清漕政。汰蠹役。自總督以下。相戒不得受所屬一錢。極陳

蘇松浮糧之困。先後奏免額賦數十萬兩。乃興學以善民俗。令城內外及鄉鎮。皆立社學。擇諸生中賢者爲之師。月會明倫堂。講孝經小學。重修泰伯祠。及范文正周忠介二祠。朔望望謁。燬坊刻淫詞小說。禁火葬及淹柩者。令下一歲報葬三萬餘棺。居二年。吏治蒸蒸。民俗丕變。

英人維思蘭。約翰者。立身勤學。植德播化。平居每踵貧病之門。照顧一切。至老不倦。馬背馳驅。計四十年。且行且讀。手不釋卷。宣講有四萬次之多。前後捐於慈善事業之金。約十五萬圓。蓋彼惟知爲人人盡力而已。

魏敏果公家居奉親。每將古今嘉言善行。稱述膝前。並令子弟家人。環列而聽。日以爲常。以娛親心。以訓子弟。以式鄉里。

善言博採

宋邵康節先生曰。上品之人。不教而善。中品之人。教而後善。下品之人。教亦不善。不教而善。非聖而何。教而後善。非賢而何。教亦不善。非愚而何。宋胡五峯先生曰。人若憚於自責。則無克己之勇。恥於下問。則無好善之誠。管子書云。善氣迎人。親如兄弟。惡氣迎人。畏如戎兵。不言之聲。疾如雷鼓。

劉子政云。言人之善。澤如膏沐。言人之惡。痛如戈戟。
明高景逸先生云。見人一善。忘其百乖。此待人之道也。修身行善。一言敗之。此持己之戒也。

清唐翼修先生曰。事事存心利物。處處存心利物。時時存心利物。雖終身貧賤。無一毫恩惠及人。而天地鬼神。必以全善報之。以其心實可嘉。特阻於力之未逮也。事事存心利己。處處存心利己。時時存心利己。雖偶爾慷慨。施財作善。而天地鬼神。亦未必以善報之。蓋謂其心實可誅。即偶爾施財。不足以贖其辜也。故日月之照臨。鬼神之糾察。皆在人心意念之間。初不在營爲形狀之跡也。觀感應二字之義。則可識矣。

袁君載曰。人之存心仁厚者。其用尺度量衡。必公平均一。不貪小利。以虧他人。此卽善也。其存心私刻者。專圖利己。買賣異尺秤。出入異斗斛。輕重大小之間。得利幾何。而喪失本心甚矣。蓋幽暗之中。鬼神在焉。人可欺。天可欺乎。未有不遭天譴者也。唐韓退之先生云。古之君子。其責己也重。以周。其責人也輕。以約。故不怠。輕以約。故人樂爲善。

唐翼修先生曰。先哲有言。歲逢旱荒。饑民滿道。然我減一二口食。彼積至三四處。亦可救饑。我施一二文錢。彼積至十餘處。亦可度命。若曰善門難開。恐有不繼。密持錢米於流民往來之地。隨緣給之。老幼殘疾者加之。不居名。不露相。救得一人。施得一日。亦係陰功。力竭則止。何慮其不繼也。

明宋潛溪先生云。積邱山之善。尙未得爲君子。貪絲毫之利。便已陷於小人。清張楊園訓子語云。易曰。積善之家。必之餘慶。積不善之家。必之餘殃。又曰。善不積。不足以成名。惡不積。不足以滅身。人之爲善。修其孝弟忠信。祇是理之當然。其不爲不善。亦由此心之良。不敢自傷。非欲徼福慶於天也。然論常理。吉凶禍福。恆亦由之。積之之勢。不可不畏也。父子兄弟。心術念慮之微。夫妻子母。幽室墻陰之際。勿謂不足動天地。感鬼神也。天地鬼神。不在乎他。在吾身心而已。

明袁了凡先生曰。一心爲善。正念時時現前。邪念自然污染不上。如太陽當空。魍魎潛消。此精一之真傳也。

清俞曲園先生曰。鰥寡孤獨。仁政所先。幼而無父。尤可憐憫。管子入國篇有恤孤之法。凡國都皆有掌孤士人死。無父母所養。屬之其鄉黨。知識故人。養一孤者。一子無

征。養二孤者。二子無征。養三孤者。盡家無征。掌孤數行問之。此之謂恤孤。其法詳善。後世可仿而行之。

清曾文正公云。凡人一身。祇有遷善改過可靠。凡人一家。祇有讀書修德可靠。

魏叔子云。毋毀眾人之善。以成一己之名。毋役天下之理。以護一己之過。

朱子云。天理有未純。是以爲善常不能充其量。人欲有未盡。是以除惡常不能去其根。

史搢臣願體集語曰。我如爲善。雖一介寒士。有人服其德。我如爲惡。雖位極人臣。有人議其過。

張考甫云。天之助人爲善也。至快至周。而略無毫髮之或慳。天之報人爲惡也。亦至信至密。而略無毫髮之或漏。細考遠計。當自見爾。

漢董仲舒云。積善在身。猶長日加益。而人不知也。積惡在身。猶火之銷膏。而人不見也。

孟申和云。見人爲不善事。須勸止之。知而不止。止而不能。令友過成。亦我之咎也。何慎吾曰。凡惡之初作。只緣一念之差。未必不可勸禁。惡之既熾。猶有一念之明。未

必不可解救。但世每拒絕如讎。而渠亦趨死如鶩。及淪罔赦。悔恨無及。任世道之責者。所當引爲己辜。奚啻憐憫而已也。若善則人我所同得。人每妄分彼此。高者惟欲善自己出。卑者亦不欲善自人行。甚有誣詞以抵瑕。陰訐以敗美者矣。亦知樂人善者之爲善更多乎。矧能樂善者。不獨誘掖於事始。獎勵於當機。善自我成者。爲吾善也。即彼之善已完滿。吾力能登籲。固以發潛德之光。即言可播揚。亦可鼓好修之趣。使已善者益加堅信。未善者聞風興起。與人爲善。君子之所以大哉。

顏光衷曰。兵主殺。而以救民止暴。則生機在焉。故能以生用殺。則功無在將上者。何也。拋一死。救萬生。視尋常行善。固有不同。若以殺用殺。則罪亦無在將上者。第一無事生事。以百萬枯骨。博封侯印。第二鏖戰屠害。敗則多殺已。勝則多殺敵。第三冒殺平民。攘功首級。又軍無紀律。縱其劫掠。至有木梳賊。篋機兵之謠。痛何如乎。何怪世之爲將者。多不良死哉。

姚若侯云。兵荒者。世界一劫運也。救劫者。順天之心。逆天之運。天心好生。順以承之。天運行殺。逆以挽之。人道之所以與天地參也。人欲一日而行千百善。一人而救千百人。舍却此等時。無處著力矣。

高景逸曰。見過所以求福。反己所以免禍。常見己過。常向吉中行矣。自認爲是。人不好再開口矣。非是爲橫逆之來。姑且自認不是。其實人非聖人。豈能盡善。人來加我。多是自取。但宜反求。道理自見。如此。則吾心愈細密。臨事愈精詳。一番經歷。一番進益。省了多少氣力。長了多少識見。小人所以爲小人者。只是別人不是而已。

清宜興史玉涵先生曰。從善如登。從惡如崩。古人歎善難而惡易也。

朱子云。要做好人。則上面煞有等級。做不好人。則立地便至。只在把住放行之間耳。攀躋分寸不得上。失勢一落千丈。強學者可不知所畏哉。

曾文正公云。禍福由天主之。善惡由人主之。由天主者。無可如何。只得聽之。由人主者。盡得一分。是一分。撐得一日。是一日。

清揚州石天基先生曰。天地間萬事萬物。惟善可以感鬼神之祐錫。惟善可以延壽命之夭折。吾人大綱。凡忠孝節義。須要夙夜矢慎。又要以言行惠及於人。卽舉一念。出一言。行一事。先存心思。想曰。此念可利益於人乎。此言此事。可無損於人乎。有利於人者。卽毅然見之實際。苟無益而損人者。念卽勿起。言卽勿說。事卽勿行。時刻存心。反躬刻責。惟恐有不善。而行善始力。大抵只要本念無惡。卽橫來直去。總歸於善。

人邪我正。人惡我良。人生事。我息事。人害人。我爲人。赤心白意。儼然有天地鬼神在前。此人縱有凶災夭折。天地鬼神必暗加護持矣。善之一字。真生生世世受用不盡。若如意寶珠。何求不得。非獨祈壽一事而已也。

唐彪云。慳吝與儉。大有分別。當於理之謂儉。專吝於財之謂慳。寒不惜婢僕。而令之無棉食。不惜婢僕。而令之饑餓。剩肥餘菜。不吝婢僕。沽唇。家產甚多。而三族之極貧無告者。有求不應。家貲有餘。而最善之事。毫不肯爲。乞丐至門。任彼呼號。而顆粒不與。此之謂慳。蓋儉者用財不過財之謂。非殘忍刻薄。只知有財。而不知有用之謂也。願人深辨乎此也。

明薛文清公曰。人譽己。果有善。但當持其善。不可有自喜之心。無善則增修焉可也。人毀己。果有惡。即當去其惡。不可有惡聞之心。無惡則加勉焉可也。

明呂新吾先生曰。爲惡非天。爲善非命。在我而已。吾語人以善爲性之當爲。惡爲理之不可爲。未必吾聽。若夫爲一善而此心快慍。不必自言。而鄉黨稱譽之。君子敬禮之。鬼神福祚之。身後傳誦之。子孫榮之。爲一不善。而此心愧怍。雖欲掩護。而鄉黨傳笑之。王法刑辱之。鬼神災禍之。身後指說之。子孫羞之。此二者孰得孰失。夫有小善

而矜。聞小譽而喜。是人人皆知善之當爲。奈何棄身於惡。而陷此百凶乎。寒山子曰。修性之道。除嗜去欲。奮神保和。所以省累也。內抑其心。外檢其身。所以寡過也。先人後己。知柔守謙。所以安身也。善推於人。不善歸己。所以養德也。功不在大。過不在小。所以積功也。然後內行充。而道在我矣。

元許魯齋先生曰。稱人之善。宜就迹上言。議人之失。宜就心上言。蓋人之初心。本自無惡。特以利欲驅之。故失正理。其始甚微。其終至於不可救。仁人雖惡。其去道之遠。然亦未嘗不愍其昏暗無知。誤至此極也。故議之必從始失之地言之。使其人聞之。足以自新而無怨。而吾之言。亦自爲長厚切要之言。善迹既著。卽從而美之。不必更求隱微。主爲一定之論。在人聞樂於自勉。在我則爲有實益。而又無他日之弊也。

善苑詩歌

節欲口占

江蘇鹽城郭介梅
法名 震居士

戒淫處女

待字深閨計有年。桃夭嫁女及時先。若教誘迫成污辱。他日于歸恨萬千。

戒淫人婦

人各有妻古訓詞。好還天道影形隨。告君戀蝶尋花柳。正是賢荆野合時。

戒淫嫖婦

此身已恨劫生餘。別鵲離鸞慘獨居。縱遇文君新守寡。世人切莫效相如。

戒淫乳媪

不爲饑寒不作傭。芸人舍己志何從。最憐五夜淒涼苦。猶哺嬰兒汁乳濃。

戒淫尼姑

現身已苦入空門。萬念皆灰護法根。忍結鴛鴦污佛地。問君心理竟何存。

戒淫娼妓

宿娼畢竟自戕身。失業傷財不復人。一旦楊梅奇毒染。妻孥受害苦無倫。

鴻嗷輯題詞

許世英字靜仁

琴堂解組返家鄉。贏得多年姓字香。閉戶著書療世俗。救災拯溺佛心腸。言言木鐸驚聾聵。字字金針挽倒狂。讀到此編能實踐。何愁步步不康莊。

杯渡齋文集題詞

陝西三原王典章字幼農

浩劫彌天日。奇災徧地時。憑將胞與念。寫出挽回辭。直道今重見。高才古可期。焚香

三復後。吾意亦欽遲。

題觀音法要醒言

安徽歙縣 姚鑑清

觀嗟五濁擾英豪。音不醒迷擊怎逃。法顯神通宣救度。要施陰德脫籠牢。慈航特濟三千界。寶筏希將萬眾招。接引有緣登佛路。人如篤信可昇超。

偶過刑場痛言

湖南長溪 曾漱瓊
愛松竹 梅居士

不作良民作莠民。受刑慘狀最愴神。殺機凶很如何止。惟望爲邦有善人。上行德政下蒙恩。感化深深徧遠村。雖賞多金人不竊。奚遭大辟命難存。

省餘存稿題詞 錄一

安徽婺源 程翼雲
字筱鵬

眾生共業悔嫌遲。孽海無邊禍正滋。隻手欲援天下溺。虔心每在佛前祈。楊枝水向災區灑。車馬錢從潤例支。如此慈悲猶未足。賑餘更送勸人詩。

慈善彙報兩週紀念題詞

浙江諸暨 陳錦文
字丹宣

慈光照耀界三千。善氣迎人動九天。彙集嘉言宏採擇。報增特色樂宣傳。兩番花信今重轉。週歲瓜期倍更延。紀事謹嚴逢普度。念茲浩劫在當前。

讀慈善報有作

四明 李志標

慈音善行鬧中華。化盡干戈樂事賒。天意全憑人意挽。時人盍早上仙槎。

慈善彙報出世

江蘇鹽城姜履字坦之

慈光照燭三千界。善氣充盈兩大間。彙輯庸言求實是。報章命義重如山。

三達德吟

浙江吳興蔡振紳費隱子

智

智慧原由戒定生。胸懷豈爲利名縈。靈徵月鏡千秋朗。澄象冰壺一片清。樂水無私心自溥。臨機有覺視常明。知人不惑參天理。巧運璿璣比玉衡。

仁

仁者寬宏大度容。黎民於變慶時雍。好風翕受春臺樂。甘雨旃幪夏屋封。德溥太和天覆物。恩周匝地海朝宗。生成化育渾無極。愛日長存不畏冬。

勇

勇敢無嚴反惡聲。惟能守約勝精兵。雄夫猛若雷霆震。壯士威堪霹靂爭。一怒安民爰篤祐。四方罪我恥衡行。先賢自縮明天理。往敵千人亦不驚。

贈朱子橋將軍

郭介梅

朱公印慶瀾、前長東省、善政頻頒、但有益、無不興崇、民二十年任國民救濟水災委員會長、援溺各縣同胞、近組東北難民救濟會、拯危極其熱心、

紫陽世澤浩無涯、長發其祥積善家、菩薩心腸超上竺、英雄肝膽照中華、錦衣累葉將軍樹、旌節交柯逸老花、義粟仁漿流不盡、恆河萬斛唱量沙、不從濁世說功名、宦海何如慧海清、災域窮黎籌急振、義倉家法廓常平、性禾善米宣三德、移粟分困慰眾生、有脚陽春經過處、仁風翔洽愜輿情、

放生救物得智四章

曾漱瓊

得智慧男

放生好善振家風、聽送元音迥不同、得子長成天性敏、六韜三略並精通、

脫癡駭相

靈蛇被執救何時、偶語相知買放之、夢有花衣人佐讀、令他公子化愚癡、

蟻助文思

莫害潘園蟻萬千、還栖故處寢猶安、及登藝苑神明助、勃發文情涌若泉、

解網成道

俗服章身混獵人。救生出網十餘春。從茲四顧翻然悟。端坐曹溪不染塵。

奉題介梅郭局長重修增福橋徵信錄

阜寧欒秀生字毓青

川濟真堪慰眾思。黃金勸募苦奔馳。申公說法天花墜。郭泰談經古道持。囊解巨資仁不讓。橋成增福德常垂。往來從此無危險。有口皆碑頌弗疲。

十月輿成志獨超。最難桑梓仰清標。豈徒大有陰功積。還爲同仁令聞昭。題柱倍增今昔感。憑欄幾閱去來潮。但求道岸登從速。不羨揚州廿四橋。

和嚴筠清女士題獅江大士眞影原韻

隴南冉寬洪字鈞堂

節比松筠悟色空。觀音刊內拜慈容。虔題眞影心相印。信念洪名願本宏。妙偈夢中參夙諦。長歌吟就化風蒙。現身說法猶龍女。立德立言並立功。

崇信觀音同志會醒言

德清姚清陽

崇德由來學見高。信心堅固及時超。觀空身世層層累。音徹蓬壺念念拋。同享個中眞趣味。志攻這點最逍遙。會同天下如斯事。齊上靈山把佛朝。

贈黃涵之道尹

郭介梅

黃公前任會稽道尹。多惠政。著有勸世白話文。及初機淨業指南等書。刊布屬縣。

風俗大轉。解組回籍。以辦賑活人爲急務。梅曾奉命助局查放。爰占俚律紀績。廉耿慈良。頌乃公。任勞任怨。拯災窮。施恩素志。原超宇。市義芳名。不讓馮。放眼未遑。悲逐鹿。關心惟有恤哀鴻。從慈肉白回生者。但聽彌陀萬口同。

勸戒烟五言百字歌

陳錦文

洋烟入中國。流毒爲最深。初嗜精神倍。得妻孥歡心。牀頭人陪伴。箇中樂趣尋。及至成大癮。無藥可砭鍼。室人求離異。孤燈伴影衾。一息存奄奄。厲禁干森森。一朝被拘獲。方知禍事臨。變賣家中產。首納保證金。挫辱喪人格。不如獸與禽。此身入囹圄。甘受獄吏侵。

戒殺放生歌

四川雙流劉咸榮字豫波

天地有情盡生氣。人心無情盡殺機。浩劫如何能挽救。一片夕陽西。千簑魚蝦聲似雨。萬家刀俎血成溪。殺氣多時成浩劫。一片黑雲垂。隨處動機皆生氣。依人動物盡慈光。養得心田春意暖。一片佛雲揚。剪十方魔王指甲。合萬人菩薩心腸。不使乾坤留血點。一片清淨光。

勸孝親歌

吉林雙城楊覺儒字振聲

勸君千萬孝雙親。補報小時養育恩。今世修下來世福。前世不修今生貧。世上善莫大於孝。不善莫過忤逆人。你能孝不出逆子。子能孝不生逆孫。有好兒孫卽是福。無多田地不爲貧。

慨言

郭介梅

知止者不殆。豈爲名利縛。知足者不辱。磊磊且落落。古人生我前。先我開知覺。我生古人後。無識緣無學。恆爲災黎謀。任他俗子薄。賓朋相往來。信義未爽約。得失盡忘懷。儒餐甘淡泊。濟世乏津梁。匡時鮮策略。常思己過愆。勿道人過惡。衡門可安居。食飲賴耕鑿。佛典素研求。清夜燈閃爍。轉危以爲安。呼天施救藥。土產魚暨鹽。恆業無可托。追慕陶淵明。林泉四時樂。

善翁事略

編者徵輯

溫泉老人

老人姓周。名仁帆。字福守。湖南湘鄉人。所居有溫泉。因號溫泉居士。又號溫泉老人。其學以克己謹獨。踐履篤實爲本。而不屑屑於尋行數墨。幼喪父母。至今孺慕不衰。而尤惓惓於立身行道。思貽父母令名。以要其終。性儉習勤。尤能急人之急。生平善

行甚多。其最著者。爲代焚鬻妻之券。俾破鏡重圓。以外如構亭道旁。盛夏設茶以飲。喝人續修族譜。倡復宗祠香燈祀會。以及育嬰除道。備荒惜字。諸要政。悉惟力是視。不稍顧卻。且遇人紛爭。無不曲爲排解。民國初元。主湘邑議席。梓鄉利弊。多所興革。晚年遁跡玄門。潛心佛學。好善精進。樂以忘年。嘗輯刊三益合編。有容叢刊諸書。以覺世牖民。其成己成物之心。蓋不啻合忠恕慈悲而一爐冶之者。尙有訓嗣隨錄。有容續刊待梓。參蕭履珠所爲之傳錄

常寶子

常寶子先生陳磬裁。浙江鄞縣人。僑寓上海周家嘴路三多里。經商所獲。悉行善事。民國十七年後。聞東陽縣章和達。吳世成。陳經典。施友煙。樓京泉等。親死廬墓。乃微行至東。逐一尋訪。或借名服賈。或託言失途。不動身色。嚴密偵查。果皆至性過人。難能可貴。爰歷序其實。兼丐名人文墨。刊訂成書。名曰東陽五孝記略。多方分送。以廣流傳。嗣又附刊於所註之文帝孝經新註之後。一再刷印。郵送各省。藉表潛幽而興效法。後更請葉善士蓬嚴。經理建設鐵幹水汀大橋於東陽城東南五十里之橫錦溪。橋上設五亭。分署五孝子名。並繪刊廬墓時狀態。各以淺言述其事。顏其額。

曰五孝橋。又誌其目曰第九橋。蓋橋之獨任建築者。此其第九也。靡資十萬金。於民國二十二年秋八月。橋工告竣。東陽張大庚。撰有東陽五孝橋感言。錄登上海善彙報。以表其事。又民國二十一年。獨刊大洞經示讀木板。印刷惠世。板存上海善堂善書局。又嘗捐貲助人印書。並隨時購買善書送人。其他陰騭事。更不可知云。

衆善快覽

助印善士芳名

常寶子 五十元

馬洗凡 五十元

梁彬軒 四元

郭介梅 二元



#2

408034